

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI RABU : 4 NOVEMBER 2020

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 6, 11 HINGGA NO. 57)

[SOALAN NO 6 DIJAWAB BERSEKALI DENGAN SOALAN NO 18, 56 dan 57]

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 4 NOVEMBER 2020 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan jaminan dari aspek kecukupan pembekalan vaksin untuk COVID-19 yang dikatakan sedang berada dalam fasa penentuan harga tempatan, dan apakah usaha Kementerian dalam memastikan vaksin tersebut dapat dibekalkan secara saksama kepada rakyat luar bandar dan pedalaman yang tidak berkemampuan.

JAWAPAN

Tuan Yang di-Pertua,

1. Izinkan saya menjawab bersekali soalan ini bersama soalan bertarikh hari ini di nombor 18 daripada Yang Berhormat Permatang Pauh, nombor 56 daripada Yang Berhormat Kapar, nombor 57 daripada Yang Berhormat Serian serta soalan bertarikh 10 November 2020 bernombor 8 daripada Yang Berhormat Terbrau dan nombor 58 dari Yang Berhormat Kimanis.
2. Untuk makluman ahli-ahli Yang Berhormat, Malaysia ketika ini tidak mempunyai fasiliti pembuatan vaksin bagi kegunaan manusia dan ini termasuklah juga bagi penyakit COVID-19.
3. Jaminan akses awal dan aspek kecukupan pembekalan vaksin adalah sangat penting bagi menjamin bekalan vaksin COVID-19 dapat disediakan kepada semua lapisan masyarakat di Malaysia. Vaksin

SOALAN NO : 6

COVID-19 yang telah dikenal pasti hendaklah selamat dan keberkesanannya terbukti.

5. Justeru, kerajaan menerusi kaedah diplomasi sains yang digerakkan bersama bermula April lalu antara Kementerian Kesihatan Malaysia (KKM), Kementerian Luar Negeri (KLN) dan Kementerian Sains, Teknologi dan Inovasi (MOSTI) telah melaksanakan pendekatan pelbagai hala (*multi-proged approach*) bagi membolehkan Malaysia memperolehi jaminan akses kepada bekalan vaksin COVID-19 yang sedang giat dibangunkan di seluruh dunia.

6. Berdasarkan senarai vaksin COVID-19 daripada WHO bertarikh 3 November 2020, terdapat 202 calon vaksin sedang dibangunkan dengan 10 daripadanya berada dalam ujian klinikal fasa 3. Menerusi pendekatan pelbagai hala daripada diplomasi sains Malaysia, beberapa rundingan telah dan sedang dimuktamadkan dengan pembangun vaksin di seluruh dunia termasuklah bersama kerajaan China apabila lawatan pada 13 Oktober yang lepas, Menteri Luar China, Wang Yi telah umumkan Malaysia berada dalam senarai keutamaan untuk menerima vaksin daripada China. Selain daripada itu rundingan Fasiliti Akses Global Vaksin COVID-19 (COVAX), dan juga syarikat farmaseutikal luar negara yang lain.

7. Kerajaan juga mengalu-alukan penglibatan entiti-entiti swasta dalam urusan perolehan vaksin dan mendirikan fasiliti pembuatan vaksin termasuk melalui pendekatan kerjasama awam-swasta (*Public Private Partnership*). Pendekatan kerjasama awam swasta ini telah dibincangkan di dalam Mesyuarat Majlis Sains Negara pada bulan Julai yang lepas. Pemilihan syarikat farmaseutikal tempatan yang memenuhi syarat Amalan Perkilangan Baik (GMP) mengikut standard *Pharmaceutical Inspection Co-operation Scheme* (PIC/S) akan dilakukan secara telus mengikut keupayaan untuk membeli vaksin (*finished product*) atau mengilang pembotolan (*fill and finish*) produk.

8. Bagi tujuan penyelarasan dalam memastikan bekalan vaksin COVID-19 diperolehi dengan segera, selamat dan sempurna; Jawatankuasa Khas Jaminan Akses Bekalan COVID-19 (JKJAV) telah

SOALAN NO : 6

ditubuhkan melalui persetujuan Jemaah Menteri pada 21 Oktober 2020 yang dipengerusikan bersama oleh Menteri Kesihatan Malaysia (KKM) dan Menteri Sains, Teknologi dan Inovasi (MOSTI) yang bertindak sebagai Jawatankuasa Induk dalam merancang, melaksana dan memantau keseluruhan strategi untuk pembekalan vaksin COVID-19.

9. Sehubungan itu, bekalan vaksin awal dijangka diperoleh pada suku pertama 2021 dengan wajaran pertama untuk 3% populasi negara yang terdiri daripada para petugas barisan hadapan (*front-liners*) meliputi sektor kesihatan dan keselamatan seperti doktor, jururawat, polis, petugas penjara dan imigresen. Akses vaksin kepada masyarakat di luar bandar dan pendalaman yang tidak berkemampuan juga akan diperhalusi dan akan diangkat sebagai keutamaan sejajar dengan COVID-19 ini dilihat sebagai satu keperluan asas awam atau *public good*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI JALALUDDIN BIN HAJI ALIAS
[JELEBU]**

TARIKH : 4 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan apakah perancangan yang dirangka oleh pihak Kementerian bagi melahirkan lebih ramai golongan profesional di kalangan masyarakat Orang Asli.

JAWAPAN

Tuan Yang di-Pertua,

Kerajaan melalui Jabatan Kemajuan Orang Asli (JAKOA) sentiasa komited bagi melahirkan masyarakat Orang Asli yang mempunyai pencapaian pendidikan dan kemahiran arus perdana. Berdasarkan kepada Plan Strategik JAKOA Tahun 2016 hingga 2020, dibawah Fokus 3, Modal Insan dan Kemahiran Belia telah menggariskan teras strategik utama iaitu membangunkan modal insan masyarakat Orang Asli dan meningkatkan kemahiran belia dan beliawanis di kalangan masyarakat Orang Asli. Berdasarkan kepada teras strategik ini yang dibahagikan kepada program seperti berikut;

- a. Program 1
Fokus kepada Program Pendidikan Awal Kanak-Kanak
- b. Program 2
Fokus kepada Program Kecemerlangan Pendidikan (PKP)

- c. Program 3
Fokus Program Jejak Siswa (PJS)
- d. Program 4
Fokus Program Pembangunan Minda Insan (PPMI)
- e. Program 5
Program Latihan Kemahiran dan Kerjaya (PLKK)

Dalam merancang pembangunan modal insan di kalangan masyarakat Orang Asli, pihak JAKOA telah merangka plan tindakan menempatkan pelajar lepasan Sijil Pelajaran Malaysia (SPM) dan Sijil Tinggi Pelajaran Malaysia (STPM) kepada dua segmen pendidikan iaitu akademik dan bidang latihan kemahiran.

KPLB melalui JAKOA juga menjalankan kerjasama strategik bersama Kementerian Pengajian Tinggi (KPT) dan Kementerian Pendidikan Malaysia (KPM) yang melibatkan Institut Pengajian Tinggi Awam dan Swasta seperti Universiti Teknologi MARA (UiTM), Institut Pendidikan Guru Malaysia (IPGM), Universiti Kuala Lumpur dan German-Malaysian Institute (GMI).

Berdasarkan kepada maklumat kerjaya di kalangan masyarakat Orang Asli dari tahun 2010 sehingga 2020 terbahagi kepada sektor awam dan swasta. Dalam sektor awam, pada tahun 2010 seramai 1,416 orang, manakala tahun 2020 seramai 3,420 orang. Ini telah menunjukkan peningkatan sektor awam sebanyak 59%. Bagi sektor swasta pula pada tahun 2010 seramai 722 orang dan bagi tahun 2020 seramai 1,977 orang. Ini pula telah menunjukkan peningkatan sebanyak 63%.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 4 NOVEMBER 2020 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan apakah Kerajaan bercadang untuk menubuhkan Insurans Kesihatan atau Kad Kesihatan kepada seluruh rakyat bagi kes penyakit serius atau pembedahan. Ini bertujuan memberi pilihan kepada pesakit bagi mendapatkan rawatan di hospital swasta terutama melibatkan kes kecemasan.

JAWAPAN

Tuan Yang di-Pertua,

Untuk makluman Ahli Yang Berhormat, setakat ini kerajaan belum bercadang untuk melaksanakan program Insuran Kesihatan (*National Health Insurance*) merangkumi semua rakyat. Untuk rekod, Malaysia adalah di antara negara di dunia yang mampu memberi perkhidmatan kesihatan percuma kepada rakyat. Sesuatu yang patut dibanggakan. Peruntukan yang disediakan bagi maksud penyediaan perkhidmatan kesihatan ialah dalam lingkungan RM 30.6 Billion setahun.

Bagaimanapun, setakat ini Kerajaan juga telah memperkenalkan beberapa inisiatif baru bagi menambahbaik faedah kesihatan kepada

rakyat iaitu seperti Skim MySalam yang memberi perlindungan takaful kepada penerima Bantuan Sara Hidup (BSH) berumur 18-65 tahun bagi 45 penyakit kritikal (*Critical illness*). Faedah perlindungan MySalam adalah seperti berikut:-

- i. Pembayaran tunai RM8,000. (Sekali seumur hidup) setelah disahkan mengidap salah satu 45 penyakit kritikal yang disahkan oleh doktor hospital kerajaan, tentera dan university; dan
- ii. Pembayaran hospitalisasi RM50.00 sehari bagi tempoh 14 hari dengan jumlah maksimum RM 700.00 di hospital kerajaan, tentera dan universiti termasuk rawatan COVID-19.

Kerajaan juga memperkenalkan Skim PEKA B40 (Skim peduli kesihatan untuk B40) di bawah Kementerian Kesihatan iaitu bantuan seperti berikut:-

- i. Bantuan kewangan secara automatik kepada kumpulan B40 (Penerima Bantuan Sara Hidup) berumur 40 tahun ke atas. Bantuan ini adalah dalam bentuk kos peralatan perubatan (maksimum RM20,000); dan
- ii. Tambang pengangkutan berjumlah maksimum RM1000 bagi penerima Sabah dan Sarawak dan RM500 bagi Semenanjung Malaysia.

Kesemua faedah Skim PEKA B40 boleh diperolehi dari kaunter khas di setiap hospital kerajaan dan klinik terpilih.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan adakah pihak kementerian bercadang menubuhkan sebuah '*task force*' untuk menyelesaikan masalah guru duka lara yang masih berlarutan sehingga kini.

JAWAPAN

Tuan Yang di-Pertua,

Untuk makluman Ahli Yang Berhormat, setiap tahun Kementerian Pendidikan Malaysia (KPM) menerima lebih kurang 40,000 permohonan pertukaran guru. Ini melibatkan pertukaran antara negeri, antara daerah dan dalam daerah. Daripada jumlah ini, lebih kurang 7,500 permohonan adalah dengan alasan mengikut pasangan atau sering kali dirujuk sebagai duka lara. Selain itu, terdapat juga guru yang memohon pertukaran atas alasan lain seperti sakit kronik diri atau keluarga, ancaman keselamatan dan tempoh perkhidmatan yang lama di suatu tempat.

Secara dasarnya, pertimbangan bagi permohonan pertukaran guru dilaksanakan dengan mengambil kira tiga perkara utama, iaitu keperluan perkhidmatan, kekosongan jawatan dan keperluan opsyen di tempat yang dimohon. Dalam mempertimbang permohonan pertukaran guru, KPM perlu memastikan pembelajaran murid tidak terjejas.

Pada masa ini, pertukaran guru dibuat secara dalam talian melalui aplikasi e-GTukar. Sistem ini telah dibangunkan sejak tahun 2008. Permohonan pertukaran bagi tahun 2020 sedang diproses oleh KPM menggunakan sistem sedia ada.

Untuk makluman Ahli Yang Berhormat, pada masa ini, KPM sedang mengkaji secara menyeluruh kaedah dan sistem pertukaran guru sedia ada agar proses pertukaran guru dapat dilaksanakan dengan lebih cekap dan berkesan. KPM komited untuk memastikan kebajikan guru sentiasa diberi keutamaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan berapa peratus kawasan di bawah zon pentadbiran PBT bagi setiap negeri yang masih belum dikenakan cukai taksiran serta apa usaha pihak KPKT dalam memasukkan zon tersebut dalam zon perkhidmatan yang layak untuk ditaksirkan cukai pintu.

JAWAPAN

Tuan Yang di-Pertua,

1. Untuk makluman Yang Berhormat, adalah dianggarkan sebanyak 53.88% kawasan di bawah operasi Pihak Berkuasa Tempatan (PBT) masih belum dikenakan cukai taksiran. Anggaran ini dibuat berdasarkan data dari 10 Pihak Berkuasa Negeri sehingga 30 September 2020.
2. Untuk makluman Yang Berhormat juga, penetapan zon yang layak dikenakan cukai taksiran di kawasan operasi PBT perlu mendapat kelulusan Pihak Berkuasa Negeri selaras dengan Seksyen 127, Akta Kerajaan Tempatan (Akta 171).

3. Antara faktor yang perlu dipertimbangkan oleh PBT bagi memperluaskan kawasan atau zon yang layak dikenakan cukai taksiran adalah seperti berikut:

- (a) kemajuan pembangunan bagi kawasan tersebut;
- (b) kewajipan pihak PBT dalam memberikan perkhidmatan perbandaran bagi kawasan tersebut;
- (c) hasil kutipan yang diperolehi bagi kawasan yang dimaksudkan;
- (d) perbelanjaan yang dikeluarkan bagi kawasan yang diberikan perkhidmatan perbandaran; dan
- (e) sempadan pengurusan pentadbiran di antara agensi kerajaan terutamanya Pejabat Daerah, Felda dan lain-lain. (Contoh : Kawasan Kampung atau Felda).

4. Dengan mempertimbangkan faktor-faktor ini, PBT akan mencadangkan kenaikan cukai taksiran dengan mengemukakan cadangan tersebut di mesyuarat peringkat PBT sebelum diangkat kepada Pihak Berkuasa Negeri untuk kelulusan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' HASBULLAH BIN OSMAN [GERIK]

TARIKH : 4 NOVEMBER 2020 (RABU)

SOALAN

DATO' HASBULLAH BIN OSMAN [GERIK] minta **MENTERI PENGAJIAN TINGGI** menyatakan apakah langkah-langkah yang dilakukan oleh Kementerian untuk menangani masalah penyelarasan kemasukan pelajar-pelajar ke IPT yang terganggu akibat COVID-19.

JAWAPAN

Tuan Yang di-Pertua,

Pendaftaran pelajar baharu ke IPT bagi sesi akademik 2020/2021 ke program Ijazah Sarjana Muda telah dirancang pelaksanaannya pada bulan Oktober 2020. Atas pematuhan kepada Perintah Kawalan Pergerakan yang dikuatkuasakan oleh Kerajaan dalam membendung penularan wabak COVID-19 dan nasihat dari Kementerian Kesihatan Malaysia serta Majlis Keselamatan Negara, sesi pendaftaran dan kemasukan pelajar baharu atau sedia ada secara bersemuka telah ditangguhkan. Penangguhan ini mengakibatkan sebahagian daripada proses pendaftaran pelajar baharu perlu dibuat secara dalam talian.

Sebagai langkah untuk menangani isu-isu berbangkit akibat penangguhan tersebut, Kementerian telah memastikan kesiapsiagaan penyelarasan maklumat di peringkat Kementerian dan juga universiti dilaksanakan segera. Bilik Gerakan di peringkat Kementerian telah diaktifkan semula sebagai pusat sehati untuk membolehkan para pelajar, ibu bapa, warga IPT, atau masyarakat umum mendapatkan

maklumat berkaitan dengan penangguhan sesi pendaftaran dan kemasukan pelajar baharu atau sedia ada secara bersemuka. Informasi berkenaan dengan inisiatif bantuan yang disediakan bagi pelajar yang terjejas turut boleh diperoleh dengan menghubungi Bilik Gerakan ini. Selain itu, semua universiti awam juga telah mengaktifkan talian *hotline* masing-masing bagi memastikan penyaluran maklumat yang tepat dan sahih dapat diselaraskan bagi membantu pelajar, ibu bapa dan juga warga universiti. Pelajar dan orang ramai juga boleh mengemukakan aduan dan pandangan dengan menghubungi *hotline* ini.

Kementerian seterusnya mengambil langkah untuk menyelaraskan semula jadual tiket perjalanan bagi pelajar yang terkesan oleh penangguhan kemasukan tersebut. Penyelarasan ini dibuat dengan kerjasama syarikat-syarikat pengangkutan udara dan darat seperti Malaysia Airlines, AirAsia, Malindo Air dan FireFly serta pihak Keretapi Tanah Melayu Berhad (KTMB). Melalui kerjasama ini, pihak syarikat penerbangan mahupun pengangkutan darat telah bersetuju untuk memberikan pelajar kemudahan untuk menjadualkan semula pergerakan mereka tanpa dikenakan sebarang implikasi kos tambahan.

Sebagai langkah untuk memastikan sesi pengajaran dan pembelajaran (PdP) pelajar tidak terjejas dan dapat terus dilaksanakan, pihak pengurusan universiti awam turut menyantuni kebajikan para pelajar yang terkesan di kampus dengan menyediakan bantuan berbentuk pemberian pelan data dan peranti secara percuma atau pada harga tawaran istimewa hasil rundingan bersama syarikat telekomunikasi dan juga syarikat peranti komputer. Selain daripada itu, pengurusan universiti turut menyediakan elaun sara hidup dan bantuan makanan bagi memastikan kebajikan dan sara hidup mereka juga terpelihara.

Sekian, terima kasih._

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED SADDIQ BIN SYED
ABDUL RAHMAN [MUAR]**

TARIKH : 4 NOVEMBER 2020 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KOMUNIKASI DAN MULTIMEDIA** menyatakan rancangan bagi memastikan internet jalur lebar di negeri Sabah, Sarawak dan kawasan -kawasan di luar bandar besar seperti di Muar dapat dipertingkatkan bagi menjamin kemudahan pendidikan dan perniagaan, sekali gus dapat merancakkan pelaburan di sesebuah tempat.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat terutamanya di negeri Sabah dan Sarawak agar dapat menikmati akses kepada perkhidmatan jalur lebar berkelajuan tinggi yang lebih menyeluruh.
2. Susulan daripada pengumuman oleh YAB Perdana Menteri pada 29 Ogos 2020 lalu mengenai pelan Jalinan Digital Negara (JENDELA), sebanyak 190,115 premis di negeri Sabah akan disediakan akses

kepada perkhidmatan berkelajuan Gigabit melalui peluasan rangkaian gentian optik. Bagi perkhidmatan jalur lebar mudah alih pula, sejumlah 425 menara baharu akan dibina, manakala sebanyak 2,202 alat pemancar komunikasi sedia ada akan dinaik taraf kepada teknologi 4G.

3. Manakala, di negeri Sarawak pula, sebanyak 58,371 premis akan disediakan akses kepada perkhidmatan berkelajuan Gigabit. Untuk perkhidmatan jalur lebar mudah alih pula, sejumlah 692 menara baharu akan dibina, manakala sebanyak 2,041 alat pemancar komunikasi sedia ada akan dinaik taraf kepada teknologi 4G.

4. Bagi Parlimen Muar pula, sebanyak dua (2) menara baharu akan dibina di bawah inisiatif pelan JENDELA. Selain itu, sebanyak 2,834 pelanggan di kawasan Muar akan dinaiktaraf dari perkhidmatan rangkaian berasaskan tembaga kepada rangkaian gentian optik dan dijangka siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.

5. Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 4 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan berapa jumlah peruntukan yang dikeluarkan MARA bagi membiayai tajaan pelajar pada tahun hadapan serta jumlah penerima pembiayaan pelajaran MARA.

JAWAPAN

Tuan Yang di-Pertua,

Untuk makluman Yang Berhormat,

MARA telah pun mengemukakan permohonan peruntukan sebanyak RM2.02 billion bagi RP1 RMKe-12 tahun 2021. Permohonan ini akan menampung keperluan pembiayaan pendidikan untuk 50,000 orang pelajar di dalam dan luar negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGGAM]**

TARIKH : 4 NOVEMBER 2020 (RABU)

SOALAN

DR. MASZLEE BIN MALIK [SIMPANG RENGGAM] minta **MENTERI
PENGAJIAN TINGGI** menyatakan status pelaksanaan program
Sasterawan @ Faculty yang dilancarkan sebelum ini untuk mengangkat
martabat sastera tanah air dan para sasterawan di kalangan komuniti
menara gading.

JAWAPAN

Tuan Yang di-Pertua,

Pada tahun 2019, Kementerian Pengajian Tinggi (KPT) melalui Jabatan Pendidikan Tinggi (JPT) telah mewujudkan satu program di universiti awam yang melibatkan penggiat sastera khususnya Sasterawan Negara yang dinamakan program 'Sasterawan di Universiti'. Matlamat utama program ini adalah bagi membolehkan Sasterawan Negara berkongsi ilmu dan pengetahuan berkaitan dengan kesusasteraan dengan warga universiti khususnya pelajar.

Objektif pewujudan program 'Sasterawan Di Universiti' ini adalah:

- (a) Menyemarakkan nilai kesusasteraan setiap warga universiti tanpa mengira latar belakang ke tahap tertinggi dengan memperkasa STREAM (*Science, Technology, Reading, Engineering, Arts and Maths*);
- (b) Mengiktiraf penglibatan Sasterawan Negara di peringkat Kementerian sebagai sebahagian daripada sistem pendidikan negara;
- (c) Mewujudkan integrasi dan sinergi antara para sasterawan negara dengan ahli akademik;
- (d) Menjadi ikon kepada komuniti di universiti dengan mencurahkan ilmu, perkongsian pengalaman khidmat nasihat dan lain-lain; dan
- (e) Mengasah bakat pelajar dalam melahirkan sasterawan muda sebagai generasi pelapis pada masa akan datang.

Sebagai tanda sokongan terhadap pelaksanaan program ini, universiti-universiti awam telah mengambil inisiatif untuk melantik Sasterawan Negara dan para Karyawan sebagai Profesor Adjung, Sasterawan Tamu, Karyawan Tamu, Pensyarah Jemputan dan jawatan-jawatan lain yang bersesuaian di IPT. Pelbagai program dan aktiviti yang melibatkan Sasterawan Negara dan para Karyawan telah dilaksanakan.

Antaranya termasuklah sesi wacana ilmu, pameran karya-karya sasterawan, dan sesi bual bicara untuk manfaat warga universiti dan pelajar. Pada tahun 2020, program ini masih dilaksanakan di universiti-universiti awam. Antara aktiviti yang telah dilaksanakan ialah:

- (a) Syarahan oleh Prof Datuk Dr Mohammed Hatta Shahrom Kepimpinan Berpandukan QALB bertajuk 'Pemupukan Integriti Dalam Kepimpinan' yang telah diadakan pada 19 Februari 2020 di Dewan UTMLead, UTM Johor Bahru;
- (b) Pengwujudan "*Reading Corner* Johan Jaaffar" atau Sudut Bacaan Johan Jaaffar pada 4 Mac 2020 di Perpustakaan Tunku Tun Aminah UTHM;
- (c) Syarahan Perdana, Diskusi dan Bicara Tokoh, Sasterawan Negara Profesor Dr. Siti Zainon Ismail yang diadakan pada 16 – 17 April 2020 di UniMAS, Sarawak;
- (d) Sesi Menyantuni Sasterawan Negara Prof. Emeritus Dr. Muhammad Haji Salleh pada 2 Julai 2020 di Kediaman Sasterawan Negara, Kajang anjuran USIM;
- (e) Deklamasi Sajak Kemerdekaan 'Erti Kemerdekan', sebuah karya oleh Sasterawan Negara, A. Samad Said bersempena Pameran Kemerdekaan 63 Tahun yang telah berlangsung pada 9 Ogos – 17 September 2020 di Perpustakaan Al-Wathiqu Billah, UniSZA; dan
- (f) Majlis Penghargaan Dan Sesi Percambahan Idea Bersama Sasterawan Negara yang diadakan pada 3 September 2020 di Putrajaya anjuran Rakan Strategik Pusat Kebudayaan USIM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. SHAHIDAN BIN KASSIM
[ARAU]**

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan adakah pihak Kementerian akan mempertimbangkan cadangan untuk membina sebuah sekolah agama berasrama penuh di Arau sebagai medium institusi pembangunan modal insan secara holistik dengan menekankan konsep pendidikan Islam sebagai teras utama.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan yang selesa kepada semua murid di seluruh negara, termasuk juga untuk aliran agama. Bagi menampung keperluan pendidikan murid aliran agama di negeri Perlis, KPM telah menyediakan dua buah Sekolah Menengah Kebangsaan Agama (SMKA), iaitu SMKA Arau dan SMKA (Perempuan) Alawiyah Kangar.

Untuk makluman Ahli Yang Berhormat, KPM juga telah mengemukakan permohonan untuk pembinaan sebuah lagi SMKA baharu di Perlis dalam Rancangan Malaysia Ke-12 (RMKe-12) *Rolling Plan* 1 bagi tahun 2021. Walau bagaimanapun, kelulusan permohonan ini adalah tertakluk kepada pertimbangan agensi pusat dan kedudukan kewangan kerajaan.

Sehubungan ini, KPM berpandangan bahawa SMKA sedia ada dan SMKA yang dirancang akan berupaya untuk menampung keperluan pendidikan bagi murid aliran agama di seluruh negeri Perlis, termasuk di kawasan Arau.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 4 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan apakah status dan kedudukan pembinaan MRSM di Dungun.

JAWAPAN

Tuan Yang di-Pertua,

Untuk makluman Yang Berhormat,

MRSM Dungun telah diluluskan di bawah RP4 tahun 2019 di bawah RMKe-11 dengan kos projek berjumlah RM130 juta.

Status terkini MRSM Dungun adalah dalam proses memuktamadkan perolehan tender di bawah bidang kuasa pihak MOF. Sehingga 03 Nov 2020, pihak MOF masih belum bersidang kerana tempoh Perintah Kawalan Pergerakan Bersyarat (PKPB) yang masih berlangsung. Tarikh mesyuarat akan dimuktamadkan oleh MOF selepas PKPB berakhir.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD AZIS BIN JAMMAN
[SEPANGGAR]**

TARIKH : 4 NOVEMBER 2020 (RABU)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan adakah Kerajaan akan membantu syarikat penerbangan nasional MAS sepertimana syarikat penerbangan AirAsia dibantu dengan pinjaman yang dijamin Kerajaan.

JAWAPAN

Tuan Yang di-Pertua,

Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.

Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.

Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor

penerbangan tertakluk kepada syarat-syarat kelayakan yang telah ditetapkan.

Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Proses penstrukturan semula turut melibatkan perundingan dengan pihak pemiutang dan pajakan pesawat. Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

Untuk makluman, Kerajaan komited untuk membantu semua pihak yang terjejas dengan penularan wabak COVID-19 termasuk sektor penerbangan dan pengangkutan udara. Walau bagaimanapun, pada masa ini, Kerajaan tidak terlibat dalam apa-apa pelan menyelamatkan (*bail out*) mana-mana syarikat penerbangan komersial termasuk memberi pinjaman atau jaminan kepada Air Asia selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 4 NOVEMBER 2020 (RABU)

SOALAN

Minta **MENTERI PENDIDIKAN** menyatakan apakah langkah yang diambil oleh Kementerian untuk membantu para pelajar meneruskan sesi pembelajaran dari rumah melalui platform dalam talian, terutamanya mereka yang tidak memiliki komputer atau komputer riba di rumah memandangkan pandemik COVID-19 akan berpanjangan.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP). KPM sentiasa berusaha menyediakan akses pembelajaran kepada murid secara dalam talian dan luar talian mengikut kesesuaian guru dan murid.

Namun demikian, KPM menyedari masih wujud jurang digital dalam kalangan murid yang terdiri daripada pelbagai latar belakang sosioekonomi, sama ada di kawasan bandar, luar bandar ataupun kawasan pedalaman. Berdasarkan Kajian Kesediaan Murid dalam Pembelajaran Secara dalam Talian yang telah dilaksanakan pada 28 Mac hingga 2 April 2020, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian. Kajian ini melibatkan 670,118 responden yang terdiri daripada ibu bapa kepada 893,331 murid.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti yang bersesuaian akses internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Walau bagaimanapun, setelah sekolah dibuka semula secara berperingkat mulai 24 Jun 2020, semua murid dapat kembali berpeluang mengikuti pembelajaran secara bersemuka. Ini membolehkan murid memaksimumkan masa untuk belajar bagi mencapai tahap penguasaan minimum dalam setiap mata pelajaran atau sebagai persediaan untuk menduduki peperiksaan.

Bagi sekolah-sekolah yang terpaksa ditutup semula, murid perlu meneruskan pembelajaran di rumah. Dalam situasi kali ini, didapati murid dan guru lebih bersedia kerana mereka telah mempunyai pengalaman melaksanakan Pengajaran dan Pembelajaran (PdP) di rumah belajar dalam tempoh PKP sebelum ini. Dalam melaksanakan tanggungjawab

ini, guru komited dan berusaha bersungguh-sungguh untuk memastikan murid tidak ketinggalan dalam pembelajaran.

Sebagai langkah meningkatkan keberkesanan pelaksanaan PdP di rumah, khususnya bagi sekolah-sekolah yang ditutup atau sekolah yang melaksanakan Model Pembukaan Sekolah Secara Penggiliran, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum, selaras dengan pembelajaran norma baharu.

Untuk makluman Ahli Yang Berhormat, bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, PdP turut dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid mengikut kesesuaian. Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melukis sesuatu konsep.

Buat masa ini, KPM sedang merangka strategi pelaksanaan yang komprehensif dalam memperkasa pendidikan digital negara. KPM akan melaksanakan penambahbaikan dari semasa ke semasa bagi memperkukuh pelaksanaan pembelajaran dalam talian, terutamanya dari segi peranti, capaian, sumber dan kebolehcapaian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH
BIN HAJI MOHD FAKEH [SABAK BERNAM]**

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan jumlah rumah yang telah disediakan dan didirikan bagi tempoh 2018 hingga 2020 terkini kepada golongan muda dan rakyat berpendapatan rendah (B40) oleh KPKT melalui Program Perumahan Rakyat (PPR) Dimiliki, Program Rumah Mesra Rakyat (RMR) 2020 Syarikat Perumahan Negara Berhad (SPNB) dan bilangan yang mendapat manfaat dari inisiatif pembiayaan perumahan oleh Kerajaan di bawah LPPSA, SRP dan skim fleksi.

JAWAPAN

Tuan Yang di-Pertua,

1. Untuk makluman Yang Berhormat, dari tahun 2018 hingga 30 September 2020, sebanyak 21 projek Program Perumahan Rakyat (PPR) yang melibatkan sejumlah 8,957 unit rumah telah siap dibina di seluruh negara. Perumahan PPR ini memberi manfaat kepada isi rumah dari golongan B40 berpendapatan RM3,000 sebulan ke bawah termasuk golongan muda yang layak.
2. Berdasarkan statistik Program Rumah Mesra Rakyat (RMR) di seluruh Malaysia dari tahun 2018 sehingga kini (tahun 2020), seramai **5,154** orang yang terdiri daripada golongan belia dan yang berpendapatan rendah (B40) telah menerima manfaat daripada program ini. Perincian statistik tersebut adalah seperti jadual di bawah :

Bil.	Negeri	Jumlah RMR yang telah siap dibina
1	Terengganu	662
2	Kelantan	955
3	Pahang	507
4	Perak	602
5	P. Pinang	75
6	Kedah	316
7	Perlis	249
8	Selangor	158
9	N. Sembilan	300
10	Melaka	130
11	Johor	848
12	WPKL / Putrajaya	1
13	Sabah	88
14	Sarawak	261
15	WP Labuan	2
	Jumlah	5,154

3. Untuk makluman Yang Berhormat, berdasarkan maklumat yang dikemukakan oleh Lembaga Pembiayaan Perumahan Sektor Awam (LPPSA), Kementerian Kewangan, sejumlah 81,777 peminjam dalam kategori B40 telah diluluskan pembiayaan LPPSA. Pecahan peminjam LPPSA bagi tahun 2018 hingga September 2020 adalah seperti berikut:

Tahun	Bilangan Peminjam (B40) Yang Telah Diluluskan dan Aktif	Bilangan Peminjam Yang Telah Diluluskan Dan Aktif	Peratus Peminjam B40 (%)
	(A)	(B)	(A/B)
2018	34,114	47,921	71.19
2019	35,011	50,097	69.89
2020 (Sehingga September)	12,652	24,349	51.96
Jumlah	81,777	122,367	66.83

4. Manakala bagi Skim Rumah Pertamaku (SRP) oleh Cagamas, sejak dilancarkan pada tahun 2011 sehingga Ogos 2020, sebanyak 42,415 permohonan yang bernilai RM9,172 juta telah diluluskan di bawah skim ini.

5. Seterusnya, Skim Pembiayaan Fleksibel atau dikenali sebagai Skim Special PR1MA End-Financing (SPEF) telah dilaksanakan oleh Perbadanan PR1MA bertujuan untuk membantu golongan M40 yang layak. Setakat ini, 116 pembeli telah mendapat manfaat daripada program tersebut. Walau bagaimanapun, skim ini telah dihentikan sejak hujung bulan September 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN AWANG HUSAINI BIN SAHARI
[PUTATAN]**

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan bilakah Program “Rent To Own” akan mula diperkenalkan di Sabah kerana ianya telah mula dilaksanakan di Semenanjung Malaysia.

JAWAPAN

Tuan Yang di-Pertua,

1. Untuk makluman Yang Berhormat, Skim Sewa Untuk Dimiliki atau *Rent To Own* (RTO) bagi Program Perumahan Rakyat (PPR) telah dilaksanakan oleh Kerajaan melalui Kementerian Perumahan dan Kerajaan Tempatan (KPKT) di Semenanjung Malaysia pada tahun 2017. Skim ini bertujuan membantu pemohon PPR yang berkecukupan tetapi gagal mendapatkan pembiayaan daripada mana-mana institusi kewangan untuk memiliki rumah.
2. Bagi tujuan pelaksanaan Skim RTO untuk PPR di Sabah, KPKT telah mengadakan beberapa siri perbincangan bersama Kerajaan Negeri Sabah. Terdapat beberapa perkara berkaitan dasar, perundangan serta mekanisme pelaksanaan yang perlu diperhalusi oleh kedua-dua pihak sebelum pelaksanaan Skim RTO ini dapat dimulakan. Selain itu, faktor kemampuan penghuni PPR untuk membayar sewa melalui kaedah RTO ini juga perlu diteliti dengan lebih mendalam memandangkan kiraan kadar sewa PPR melalui Skim RTO adalah lebih tinggi berbanding kadar sewa semasa iaitu di antara RM140-RM160 sebulan.
3. Dalam hubungan ini, cadangan pelaksanaan Skim RTO di Negeri Sabah akan diangkat untuk pertimbangan dan kelulusan Jemaah Menteri terlebih dahulu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TERESA KOK SUH SIM [SEPUTEH]

TARIKH : 4 NOVEMBER 2020 (RABU)

SOALAN

Minta **MENTERI TENAGA DAN SUMBER ASLI** menyatakan peratusan kawasan hutan terbaru di Malaysia. Apakah sasaran Malaysia untuk mengekalkan lebih 50% daripada jumlah keluasan negara di bawah liputan hutan telah dimasukkan ke dalam Dasar Perhutanan Negara yang tengah melalui kajian semula.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian ini sentiasa komited dalam usaha memelihara khazanah hutan negara dan memastikan komitmen negara untuk mengekalkan sekurang-kurangnya 50% daripada keluasan tanah negara dilitupi pokok-pokok dan kawasan hutan dicapai. Sehingga tahun 2018, Malaysia mempunyai kawasan berhutan seluas 18,273,486.65 hektar atau 55.3% daripada keluasan tanah negara (33,034,500 hektar). Komitmen ini juga telah dimasukkan dalam Dasar Perhutanan Negara yang sedang dalam proses kajian semula.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATUK SERI SAIFUDDIN NASUTION BIN ISMAIL
[KULIM-BANDAR BHARU]**

TARIKH : 4 NOVEMBER 2020 (RABU)

SOALAN

**DATUK SERI SAIFUDDIN NASUTION BIN ISMAIL [KULIM-BANDAR
BHARU]** minta **MENTERI KEWANGAN** menyatakan jelaskan mengapa
moratorium pinjaman bank tidak dilanjutkan tempohnya.

JAWAPAN

Tuan Yang di-Pertua,

1. Kerajaan telah memberikan moratorium ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Selepas tamat tempoh moratorium tersebut pada September 2020, industri perbankan telah melanjutkan moratorium pinjaman secara bersasar dan memberikan fleksibiliti pembayaran balik pinjaman kepada golongan yang benar-benar terjejas akibat wabak COVID-19, seperti individu yang kehilangan pekerjaan atau individu serta perniagaan yang mengalami pengurangan pendapatan.
2. Bagi individu dan PKS dalam sektor yang masih terjejas, industri perbankan telah memberikan komitmen untuk membantu peminjam tersebut. Para peminjam hanya perlu memberi maklum balas kepada pihak bank serta memberikan sedikit maklumat yang diperlukan untuk mengesahkan status mereka. Daripada lebih 640,000 peminjam yang memohon untuk bantuan, lebih 98% telah mendapat bantuan pelbagai. Selain itu juga, didapati lebih 85% peminjam telah memulakan semula membayar balik pinjaman mereka.
3. Orang ramai tidak perlu bimbang kerana fleksibiliti yang diberikan kepada peminjam sepanjang tempoh ini tidak akan terpapar dalam laporan Sistem Maklumat Rujukan Kredit Pusat (atau CCRIS) peminjam.
4. Peminjam individu dan PKS yang mempunyai pinjaman dengan beberapa bank atau sekiranya permohonan bantuan pembayaran balik pinjaman mereka ditolak, boleh meminta bantuan Agensi Kaunseling dan Pengurusan Kredit (atau AKPK) bagi menyemak semula permohonan mereka dan menyediakan pelan pinjaman yang sesuai dengan bank mereka.

5. Sekiranya masih belum berpuas hati, peminjam juga boleh menghubungi BNMTELELINK di talian 1300 88 5465 atau e-mel bnmtelelink@bnm.gov.my untuk membuat sebarang aduan terhadap bank-bank berhubung dengan permohonan bantuan bayaran balik pinjaman mereka.

Tuan Yang di-Pertua,

6. Pelbagai saluran telah disediakan untuk memudahkan pelanggan memohon bantuan pembayaran balik pinjaman. Antaranya:

- a. Membuat permohonan melalui atas talian; dan
- b. Mendapatkan perkhidmatan cawangan tertentu dilanjutkan pada hujung minggu.

7. Selain itu, agensi BNM, AKPK dan institusi perbankan akan menganjurkan beberapa lagi siri Kempen Pembayaran Balik Pinjaman setelah mendapat respon yang baik melalui kempen yang diadakan di 12 lokasi di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan apakah langkah-langkah Kementerian dalam memastikan guru-guru dapat menghabiskan silibus pengajaran tahunan dan pelajar-pelajar dapat memahami kandungan silibus ini dengan baik dalam situasi pandemik COVID-19 yang melanda negara kita. **Rujukan:** *Keputusan KPM tutup sekolah berdasarkan penelitian data dan perbincangan.*

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam membantu guru melaksanakan pengajaran dan pembelajaran secara berterusan khususnya apabila negara dilanda pandemik COVID-19. Dalam usaha memastikan guru dapat menghabiskan silibus, KPM telah melaksanakan penjajaran kurikulum semua mata pelajaran berdasarkan kurikulum sedia ada, iaitu Kurikulum Standard Sekolah Rendah (KSSR) dan Kurikulum Standard Sekolah Menengah (KSSM). Ini melibatkan penyusunan semula kandungan, pedagogi dan pentaksiran berdasarkan hasil pembelajaran yang dihasratkan bagi memenuhi keperluan khusus mata pelajaran.

Melalui penjajaran kurikulum ini, guru boleh merancang pengajaran dan pembelajaran dengan melaksanakan kaedah pembelajaran teradun (blended learning). Pembelajaran teradun melibatkan penggabungan teknik pengajaran bersemuka di dalam bilik darjah atau pembelajaran di rumah yang dirancang secara berstruktur. KPM turut melaksanakan kunjung bantu ke sekolah untuk memberi bimbingan kepada guru berdasarkan kepada kurikulum yang diajarkan dalam tempoh persekolahan yang berbaki bagi tahun 2020.

Selain itu, KPM juga telah menyediakan Manual Pengajaran dan Pembelajaran di Rumah (PdPR) sebagai panduan kepada guru dalam melaksanakan pengajaran dan pembelajaran secara berstruktur dan terancang supaya murid dapat mengikuti pembelajaran di rumah secara optimum, selaras dengan pembelajaran norma baharu. Pelbagai kaedah dan pendekatan boleh digunakan oleh guru untuk melaksanakan PdPR seperti menggunakan platform DELIMa, TV Pendidikan, EduwebTV (koleksi video) dan Cikgootube. Malah, guru juga boleh menyediakan pek pembelajaran dengan pelbagai maklumat serta aktiviti yang bersesuaian untuk dilaksanakan oleh murid di rumah.

Di samping itu, pelbagai bahan sokongan berbentuk digital dan mod pembelajaran dalam talian yang mudah diakses melalui DELIMa telah dipertingkatkan bagi membantu guru dan murid dalam pelaksanaan PdP.

Bagi mengukuhkan penguasaan murid, pentaksiran dilaksanakan secara berterusan melalui pelbagai kaedah seperti tugas, kerja projek dan sebagainya. Pentaksiran membolehkan guru merancang dan melaksanakan intervensi mengikut tahap dan keupayaan murid.

Selain itu, KPM telah mengambil inisiatif meminda takwim persekolahan tahun 2020 dengan memaksimumkan tempoh hari persekolahan dan mengubah cuti akhir tahun. Perubahan takwim ini dapat membantu guru memperoleh tempoh yang mencukupi untuk menghabiskan silibus tahunan yang telah dirancang dan membolehkan murid mempunyai tempoh pembelajaran yang mencukupi sebagai persediaan pembelajaran tahun berikutnya.

KPM juga telah meminda jadual peperiksaan awam tahun 2020 kepada awal tahun 2021 bagi membolehkan murid mempunyai tempoh pembelajaran yang mencukupi dan dapat membuat persediaan rapi sebelum menduduki peperiksaan tersebut.

KPM akan sentiasa berusaha untuk memastikan murid dapat terus mengikuti pembelajaran dengan pelbagai pendekatan, terutamanya dalam keadaan yang mencabar ini. Dalam hal ini, KPM amat menghargai peranan guru dan ibu bapa untuk memastikan pengajaran dan pembelajaran dapat berjalan dengan baik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN LARRY SOON @ LARRY SNG
WEI SHIEN [JULAU]**

TARIKH : 4 NOVEMBER 2020 (RABU)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI KOMUNIKASI DAN MULTIMEDIA** menyatakan mengapakah terdapat kawasan-kawasan di pedalaman Sarawak yang mendapat liputan perkhidmatan telefon bimbit tetapi tiada liputan perkhidmatan internet walaupun wujudnya menara komunikasi di kawasan-kawasan tersebut.

JAWAPAN

Tuan Yang di-Pertua,

1. Untuk makluman Ahli Yang Berhormat, pada peringkat awal penyediaan perkhidmatan komunikasi di sesetengah kawasan di negeri Sarawak adalah lebih tertumpu kepada penyediaan perkhidmatan suara dan penghantaran pesanan ringkas. Oleh yang demikian, pada masa itu hanya teknologi 2G dan 3G yang dipasang di mana keupayaan penghantaran data adalah sangat rendah. Disebabkan perubahan penggunaan perkhidmatan komunikasi yang lebih kepada penghantaran data, maka kawasan-kawasan tersebut kerap mengalami gangguan untuk mengakses internet disebabkan oleh kapasiti data yang terhad melalui teknologi 2G dan 3G terutamanya kawasan yang menggunakan teknologi satelit (VSAT) sebagai rangkaian teras.
2. Dengan pembudayaan norma baharu dalam komuniti, penggunaan jalur lebar mudah alih berkelajuan tinggi didapati telah meningkat berdasarkan keperluan semasa. Oleh yang demikian, melalui pelan JENDELA yang sedang dilaksanakan, terdapat inisiatif untuk menaik taraf menara-menara yang masih menggunakan teknologi 2G dan 3G kepada teknologi 4G secara berperingkat di seluruh negara. Ini adalah termasuk di negeri Sarawak yang melibatkan sebanyak 2,041 alat pemancar komunikasi sedia ada yang akan dinaik taraf kepada teknologi 4G.
3. Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan untuk memudahkan proses dan kelulusan bagi projek-projek yang telah dirancang untuk dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 4 NOVEMBER 2020 (RABU)

SOALAN

DATO' SERI HAJI IDRIS BIN JUSOH [BESUT] minta **MENTERI PENGAJIAN TINGGI** menyatakan kedudukan terkini ranking Universiti-universiti Awam (UA) menerusi penarafan QS World University Rankings dan Times Higher Education.

JAWAPAN

Tuan Yang di-Pertua,

Berdasarkan laporan *QS World University Rankings 2021* (QS-WUR 2021) yang dikeluarkan pada 10 Jun 2020, Universiti Malaya (UM) telah melonjak ke kedudukan 59 universiti terbaik di dunia berbanding di tangga ke-70 pada tahun lepas. Buat julung-julung kalinya, UM dan empat (4) buah Universiti Penyelidikan Malaysia yang lain juga telah berjaya menunjukkan peningkatan yang amat membanggakan dan disenaraikan dalam kelompok 200 universiti terbaik dunia.

Empat (4) universiti selain UM yang berada dalam kedudukan, dengan izin *top one (1) percent universities in the world* ialah Universiti Putra Malaysia (UPM) yang melonjak ke kedudukan ke-132 berbanding di kedudukan ke-159 pada tahun 2020; Universiti Kebangsaan Malaysia (UKM) di tempat ke-141 (pada tahun 2020 di tempat ke-160); Universiti Sains Malaysia (USM) di posisi ke-142 berbanding pada tahun 2020 di

posisi ke-165; dan Universiti Teknologi Malaysia (UTM) di tangga ke-187 (pada tahun 2020 di tangga ke-217).

Sebanyak tujuh (7) buah universiti awam juga berjaya disenaraikan dalam senarai *top 1,000 universities in the world* oleh *QS World University Rankings 2021*, iaitu Universiti Utara Malaysia (UUM); Universiti Islam Antarabangsa (UIAM); Universiti Teknologi MARA (UiTM); Universiti Malaysia Pahang (UMP); Universiti Malaysia Sarawak (UNIMAS); Universiti Malaysia Perlis (UniMAP); dan Universiti Malaysia Sabah (UMS).

Berdasarkan laporan Times Higher Education World University Rankings 2021 (THE-WUR 2021) yang dikeluarkan pada 2 September 2020 pula, UM kekal di antara kedudukan ke-301 hingga ke-350. Lima (5) buah universiti awam yang lain juga tidak berubah kedudukannya berbanding laporan THE-WUR 2020, iaitu kekal di antara tangga ke-601 hingga tangga ke-800, iaitu UKM, UPM, USM, Universiti Teknologi Malaysia (UTM) dan UUM. Sementara itu, empat (4) buah universiti awam yang lain pula berada dalam kedudukan ke 1,001 dan ke atas, iaitu UniMAP, UNIMAS, Universiti Teknikal Malaysia Melaka (UTeM) dan UiTM.

Kejayaan ini merupakan pencapaian terbaik negara setakat ini dan membuktikan bahawa hala tuju pendidikan tinggi negara berada di landasan yang betul dalam menyediakan institusi pendidikan tinggi yang berkualiti dan cemerlang sejajar dengan matlamat Lonjakan ke-8 (Keunggulan Global – *Global Prominence*) dalam Pelan Pembangunan Pendidikan Malaysia, 2015 – 2025 (Pendidikan Tinggi), PPPM(PT). Kejayaan ini juga berupaya meningkatkan lagi jalinan kerjasama universiti awam dengan penyelidik terkemuka dunia, di samping dapat memperkukuh lagi peranan Malaysia sebagai hub pendidikan tinggi di rantau ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** minta **MENTERI PENDIDIKAN** menyatakan :-

- (a) perancangan jangka panjang Kementerian untuk mempercepatkan pembinaan sekolah daif di Sarawak memandangkan masih banyak yang perlu di baik pulih atau dibina baru; dan
- (b) sekolah-sekolah yang akan dibina atau di baik pulih dalam masa lima tahun akan datang di bawah Program Bina Baru sekolah daif di kawasan Parlimen Igan.

JAWAPAN

Tuan Yang di-Pertua

- (a) Kementerian Pendidikan Malaysia (KPM) komited untuk memastikan fasiliti bangunan dan kemudahan sekolah berada dalam keadaan baik bagi menjamin keselamatan dan keselesaan warga sekolah.

KPM sentiasa berusaha mempercepatkan pelaksanaan projek baik pulih dan pembinaan gantian sekolah-sekolah yang mempunyai bangunan daif di negeri Sarawak. Bagi tujuan ini, KPM telah mengadakan kerjasama rapat dengan pelbagai pihak seperti Jabatan Kerja Raya (JKR) Malaysia, JKR Sarawak, Pihak Kerajaan Negeri Sarawak, termasuk pihak berkuasa setempat. Ini bagi meneliti pelbagai tindakan yang perlu diselesaikan dalam fasa pra pelaksanaan sehinggalah kepada peringkat pelaksanaan projek. Dalam menyelesaikan perkara berkaitan pemilikan tanah bagi sekolah-sekolah yang mempunyai bangunan daif pula, KPM telah melaksanakan usaha untuk pemutihan pemilikan tapak sekolah dengan kerjasama pihak Kerajaan Negeri Sarawak, terutama Jabatan Tanah Dan Survei Sarawak (JTU).

Selain itu, KPM juga telah mendapatkan pengecualian khas daripada Kementerian Kewangan Malaysia untuk memendekkan tempoh pengiklanan tender bagi projek menaik taraf dan membangunkan semula sekolah-sekolah daif ini supaya pelaksanaan projek dapat dipercepatkan.

Dari aspek pembinaan pula, Kerajaan telah bersetuju agar penentuan kaedah pembinaan menggunakan teknologi *Industrial Building System* (IBS) atau secara konvensional akan dibuat berdasarkan kepada aspek aksesibiliti, kos efektif dan tempoh penyediaan agar pelaksanaan projek dapat disegerakan.

Untuk makluman Ahli Yang Berhormat, pelaksanaan projek baik pulih bangunan daif di sekolah bagi negeri Sarawak yang dibiayai melalui peruntukan RM1 bilion, iaitu kontra bayaran balik

pinjaman adalah mengikut mekanisme khusus. Mekanisme tersebut telah dipersetujui secara bersama oleh KPM dan Kerajaan Negeri Sarawak. Secara keseluruhan, projek baik pulih bangunan di sekolah dengan dana RM1 bilion tersebut dilaksanakan melalui 3 fasa:

1. Fasa 1 melibatkan 41 buah sekolah dengan kos projek berjumlah RM350 juta;
 2. Fasa 2 melibatkan 52 buah sekolah dengan kos projek berjumlah RM350 juta; dan
 3. Fasa 3 sedang dimuktamadkan senarai dan skop projek oleh KPM bersama-sama Kerajaan Negeri Sarawak melibatkan kos projek sebanyak RM300 juta.
- (b) Bagi Parlimen Igan, terdapat empat buah sekolah akan dinaiktaraf dan dibaik pulih di bawah RMKe-11 *Rolling Plan* ke-4 tahun 2020 dengan kos projek berjumlah RM98.5 juta. Sekolah-sekolah tersebut adalah seperti berikut:
1. SMK Matu;
 2. SK. Kampung Tebaang;
 3. SK. Kampung Pergau; dan
 4. SK. Bawang Tian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan berapa peruntukan yang telah diberikan untuk menerbitkan buku-buku teks Bahasa Kadazandusun sejak mata pelajaran ini diperkenalkan sehingga sekarang bagi sekolah rendah dan juga sekolah menengah.

JAWAPAN

Tuan Yang di-Pertua,

Mata pelajaran Bahasa Kadazandusun telah diperkenalkan mulai tahun 1998 untuk sekolah rendah dan pada tahun 2006 untuk Tingkatan 1 sekolah menengah. Sejak mula dilaksanakan sehingga tahun 2020, Kementerian Pendidikan Malaysia (KPM) telah memperuntukkan sejumlah RM8.959 juta bagi penerbitan dan pembekalan buku teks Bahasa Kadazandusun untuk kegunaan murid-murid di sekolah rendah dan sekolah menengah. Daripada keseluruhan peruntukan tersebut, sebanyak RM6.096 juta adalah bagi buku teks Bahasa Kadazandusun untuk sekolah rendah dan RM2.863 juta lagi untuk sekolah menengah.

Bagi tahun 2020, KPM telah memperuntukkan sebanyak RM1.083 juta bagi penerbitan dan pembekalan buku teks Bahasa Kadazandusun untuk kegunaan tahun 2021. Jumlah peruntukan ini merangkumi RM584,500 untuk sekolah rendah dan RM498,500 untuk sekolah menengah. Sehingga kini, sebanyak 410 sekolah rendah dan 44 sekolah menengah menawarkan mata pelajaran Bahasa Kadazandusun. Bilangan murid yang mengikuti mata pelajaran tersebut adalah seramai 47,191 orang murid sekolah rendah dan 6,199 orang murid sekolah menengah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan perincian status pelaksanaan projek Tabung Penyelenggaraan 1 Malaysia (TP1M) sejak 2010 sehingga kini di setiap negeri berserta kos dan tempoh siap. Perincian juga peruntukan kepada setiap negeri menerusi Tabung Penyelenggaraan Perumahan Malaysia (TPPM) dan Program Penyelenggaraan Perumahan bagi tahun 2020 dan 2021.

JAWAPAN

Tuan Yang di-Pertua,

1. Untuk makluman Yang Berhormat, Tabung Penyelenggaraan 1Malaysia (TP1M) atau sekarang dikenali sebagai Tabung Penyelenggaraan Perumahan Malaysia (TPPM) dan Program Penyelenggaraan Perumahan Malaysia (PPP) merupakan inisiatif Kerajaan Persekutuan bagi membantu penghuni-penghuni perumahan berstrata kos rendah dan kos sederhana rendah awam dan swasta untuk membaik pulih dan menyenggara harta bersama.

2. Kementerian Perumahan dan Kerajaan Tempatan (KPKT) telah meluluskan sebanyak **1,194** projek PPP dan TPPM di seluruh negara dengan peruntukan berjumlah **RM620.11 juta bagi tempoh RMKe-11 (2016-2020)**. Untuk makluman Yang Berhormat, data lengkap yang telah dikumpul bagi kedua-dua program ini adalah bermula daripada tahun 2016 dan ringkasan kelulusan projek PPP dan TPPM mengikut negeri adalah seperti berikut:

Bil.	Negeri	Jumlah Projek	Jumlah Peruntukan (RM juta)
1.	Selangor	427	301.97
2.	Johor	217	106.87
3.	Pulau Pinang	109	46.26
4.	Sabah	76	29.95
5.	Pahang	58	27.43
6.	Terengganu	38	20.20
7.	Negeri Sembilan	78	20.01
8.	WP Kuala Lumpur	27	17.90
9.	Melaka	58	14.12
10.	Kedah	24	11.10
11.	Perak	51	9.82

Bil.	Negeri	Jumlah Projek	Jumlah Peruntukan (RM juta)
12.	Perlis	9	5.50
13.	Sarawak	10	5.40
14.	WP Labuan	3	1.58
15.	Kelantan	7	1.20
16.	WP Putrajaya	2	0.80
Jumlah		1,194	620.11 juta

3. Untuk makluman Yang Berhormat juga, tempoh penyiapan sesebuah projek adalah berbeza-beza bergantung kepada kos projek, skop projek, keadaan tapak, prestasi kontraktor, input bahan dan lain-lain faktor. Sebagai contoh, penggantian / pembaikan seunit lif boleh memakan masa antara 18 hingga 24 bulan, manakala penggantian tangki air beserta pam boleh mengambil masa antara 6 hingga 12 bulan. Bagi kerja-kerja pembaikan kemudahan awam dan infrastruktur asas seperti mengecat, dataran kejut dan longkang biasanya hanya memerlukan tempoh kerja selama 3 hingga 6 bulan sahaja. Justeru, badan pengurusan dan pihak bertanggungjawab perlu bersama-sama Kerajaan untuk memantau pelaksanaan projek agar boleh disiapkan mengikut tempoh masa yang ditetapkan.

4. Bagi tahun 2021, peruntukan TPPM dan PPP sebanyak RM100 juta telah dimohon kepada Kementerian Kewangan dengan pecahan RM50 juta untuk projek TPPM dan RM50 juta untuk projek PPP. Walau bagaimanapun, peruntukan ini adalah tertakluk kepada kelulusan Belanjawan 2021 yang akan diumumkan kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN [HANG TUAH JAYA]**

TARIKH : 4 NOVEMBER 2020 (RABU)

SOALAN

**DATUK SERI SHAMSUL ISKANDAR @ YUSRE BIN MOHD AKIN
[HANG TUAH JAYA]** minta **MENTERI PENGAJIAN TINGGI**
menyatakan apakah langkah proaktif oleh pihak KPT termasuk
peruntukan penguatkuasaan dalam memastikan pengurusan universiti
dan mahasiswa tidak terjebak di dalam mempromosi atau melibat diri
secara langsung dalam skim penipuan (*scam*) yang jelas bercanggah
dengan integriti Institusi Pengajian Tinggi.

JAWAPAN

Tuan Yang di-Pertua,

Kementerian amat mengambil berat dan serius dalam memastikan pengurusan universiti dan mahasiswa tidak terjebak dalam aktiviti mempromosi atau terlibat secara langsung dalam skim-skim penipuan (*scam*). Sebagai langkah untuk menangani perkara ini, kementerian telah melaksanakan dua (2) pendekatan, iaitu; (a) menubuhkan Majlis Pegawai Integriti Universiti Awam; dan (b) menggiatkan pelaksanaan program-program kesedaran berhubung aktiviti penipuan.

(a) Menubuhkan Majlis Pegawai Integriti Universiti Awam

Majlis Pegawai Integriti Universiti Awam telah ditubuhkan pada tahun 2019 untuk membincangkan isu-isu berkaitan dengan integriti termasuk unsur-unsur penipuan di semua universiti awam. Majlis yang bersidang tiga (3) kali setahun ini, dianggotai oleh pegawai-pegawai integriti dari 20 buah universiti awam. Selain membincangkan dan mengenal pasti solusi untuk mendepani isu-isu integriti di universiti awam, Majlis ini turut bertanggungjawab untuk membuat hebahan kepada warga universiti mengenai kepentingan integriti di samping memberikan penegasan terhadap kesan penglibatan dalam perkara-perkara yang berunsurkan penipuan.

(b) Menggiatkan pelaksanaan program-program kesedaran berhubung aktiviti penipuan

Kementerian turut menggiatkan lagi pelaksanaan program-program bagi membangkitkan kesedaran mengenai integriti dan kesan penglibatan dalam perkara-perkara yang berunsurkan penipuan dalam kalangan warga universiti. Antara program yang dilaksanakan yang boleh saya kongsikan di sini ialah sesi libat urus berkaitan kepentingan integriti dalam pembangunan negara yang melibatkan penyertaan daripada semua Pendaftar, Bendahari, Penasihat Undang-undang, Ketua Unit Integriti dan Pengarah Pembangunan di universiti awam. Selain itu, program seperti *Scam Awareness Forum* turut dilaksanakan bagi memberikan

pendedahan dan kesedaran kepada warga universiti dan pelajar mengenai taktik-taktik penipuan oleh *scammer* dan langkah-langkah yang boleh diambil supaya tidak menjadi mangsa.

Pengetahuan dan kemahiran pengurusan kewangan yang baik berupaya mencegah pengurusan universiti dan pelajar daripada terjerat dengan aktiviti penipuan atau *scam*. Oleh itu, sebagai usaha memperkukuh pengurusan kewangan yang baik dalam kalangan pelajar dan mengelakkan mereka terlibat dengan perkara-perkara yang berunsurkan penipuan, Program Siswa Celik Wang (SceW) telah dilaksanakan pada tahun ini di beberapa buah universiti, antaranya di Universiti Sains Malaysia (USM); Universiti Putra Malaysia (UPM); dan Universiti Malaysia Pahang (UMP). Program ini dilaksanakan melalui kerjasama strategik dengan beberapa agensi seperti Bank Negara Malaysia (BNM), Agensi Kaunseling & Pengurusan Kredit (AKPK), Persatuan Pengguna (CAP), Kementerian Perdagangan Dalam Negeri dan Hal Ehwal Pengguna (KPDNHEP), Polis DiRaja Malaysia (PDRM) dan Suruhanjaya Komunikasi dan Multimedia Malaysia (SKMM).

Usaha untuk meningkatkan kesedaran pengurusan universiti dan pelajar perlu dilaksanakan secara berterusan bagi memberikan kesedaran kepada mereka mengenai aktiviti penipuan oleh *scammer* dan mencegah mereka daripada terlibat secara langsung atau mudah terpedaya dan menjadi mangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan langkah-langkah Kementerian dalam menyelesaikan isu guru bertugas sebagai warden asrama yang membebaskan para guru.

JAWAPAN

Tuan Yang di-Pertua,

Kementerian Pendidikan Malaysia (KPM) mengambil maklum cabaran serta beban tugas guru yang dilantik sebagai Warden Asrama dan KPM sentiasa berusaha melaksanakan penambahbaikan. Antaranya, KPM telah mengambil langkah memperluaskan pelantikan Warden Asrama kepada kakitangan bukan guru gred 19 dan ke atas pada tahun 2019 bagi mengoptimumkan penggunaan sumber manusia di sekolah.

KPM juga telah melaksanakan beberapa inisiatif bagi mengurangkan beban tugas Warden Asrama seperti berikut:

- a) Penglibatan Warden Asrama dalam aktiviti kokurikulum diminimumkan;
- b) Pengecualian Warden Asrama daripada dilantik menjadi Guru Kelas; dan
- c) Pengecualian Warden Asrama daripada mengajar pada waktu pertama di sekolah bagi membolehkan mereka memberi fokus kepada pengurusan di asrama pada awal pagi.

Untuk makluman Ahli Yang Berhormat, KPM sedang melaksanakan Kajian Penambahbaikan Portfolio Warden Asrama di Sekolah-sekolah Berasrama KPM bermula Februari 2020 dan dijangka siap pada Disember 2020. Kajian ini adalah bagi meneliti alternatif terbaik berdasarkan cadangan dan pandangan daripada pihak yang berkepentingan.

Di samping itu, KPM juga sedang meneliti dan memperhalusi beberapa cadangan penambahbaikan bagi memantapkan portfolio Warden Asrama. Cadangan ini melibatkan pelbagai perkara seperti sumber manusia, tadbir urus, keselamatan dan kemudahan infrastruktur. Cadangan penambahbaikan ini akan melibatkan penekanan kepada aspek keselamatan serta kebajikan guru dan murid secara menyeluruh. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK ZAKARIA BIN MOHD. EDRIS
@ TUBAU [LIBARAN]**

TARIKH : 4 NOVEMBER 2020 (RABU)

SOALAN

DATUK ZAKARIA BIN MOHD. EDRIS @ TUBAU [LIBARAN] minta **MENTERI KOMUNIKASI DAN MULTIMEDIA** menyatakan bagaimana Jalinan Digital Negara (JENDELA) dan Gerbang Sabah dapat memanfaatkan rakyat Sabah dan mengurangkan jurang pembangunan teknologi antara Sabah dengan Semenanjung.

JAWAPAN

Tuan Yang di-Pertua,

1. Untuk makluman Ahli Yang Berhormat, pihak Kementerian dengan kerjasama Suruhanjaya Komunikasi dan Multimedia Malaysia (SKMM) sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar termasuk di negeri Sabah.
2. Di bawah pelan Jalinan Digital Negara (JENDELA) yang telah diumumkan oleh YAB Perdana Menteri pada 29 Ogos 2020 lalu, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.
3. Sasaran fasa pertama yang bermula sekarang sehingga tahun 2022 adalah :
 - a. membolehkan penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;
 - b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
 - c. mempertingkatkan kelajuan purata jalur lebar mudah alih daripada 25Mbps kepada 35Mbps.
4. Pelan JENDELA juga akan melibatkan penamatan rangkaian 3G secara berperingkat sehingga akhir tahun 2021 untuk mengoptimumkan penggunaan spektrum bagi pemantapan rangkaian teknologi 4G.
5. Pelancaran Gerbang Sabah yang diadakan pada 17 September 2020 yang lalu iaitu stesen pendaratan kabel gentian optik dasar laut di Tanjung Aru, Kota Kinabalu, Sabah mengukuhkan komitmen kerajaan

dan penyedia perkhidmatan telekomunikasi untuk memastikan kualiti pengalaman di antara pengguna di negeri Sabah dan Sarawak adalah sama dengan pengguna di Semenanjung.

6. Negeri Sabah sebagai penerima terbesar manfaat pelan JENDELA akan mendapat pembangunan infrastruktur telekomunikasi yang lebih menyeluruh. Sehingga tahun 2022, rangkaian gentian optik akan diperluaskan kepada sebanyak 190,115 premis untuk menyediakan akses kepada perkhidmatan jalur lebar talian tetap berkelajuan gigabit. Untuk perkhidmatan jalur lebar mudah alih pula, sejumlah 425 menara baharu akan dibina, manakala sebanyak 2,202 alat pemancar komunikasi sedia ada akan dinaik taraf kepada teknologi 4G.

7. Bagi membantu rakyat Sabah meningkatkan taraf hidup seiring dengan pelaksanaan pelan JENDELA, SKMM menyusun semula peranan 133 Pusat Internet Komuniti (PIK) yang telah diwujudkan di negeri Sabah. Peranan PIK adalah untuk membangunkan kemahiran penggunaan Internet dan penglibatan e-dagang di kalangan komuniti luar bandar, akan diperkemaskan agar limpahan perkhidmatan, pengetahuan dan peluang ekonomi yang dicetuskan oleh pelaksanaan pelan JENDELA dapat dinikmati oleh semua golongan masyarakat termasuk penduduk di kawasan pedalaman negeri Sabah.

8. Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang untuk dilaksanakan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 4 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan tindakan Kementerian dalam memperkasakan sukatan pelajaran di **TABIKA KEMAS** ke arah melahirkan modal insan luar bandar yang dapat memenuhi keperluan masa hadapan.

JAWAPAN

Tuan Yang di-Pertua,

KEMAS telah mengambil inisiatif memperkenalkan Pendidikan STREAM (*Science, Technology, Religions, Engineering, Arts dan Mathematics*) di TABIKA KEMAS. Inisiatif ini sebagai anjakan paradigma ke arah melahirkan modal insan luar bandar yang perlu diterapkan dengan kemahiran abad ke-21 bagi mendepani cabaran Revolusi Perindustrian Keempat (IR4.0) seperti kemahiran berkomunikasi, bekerja dalam kumpulan (berkolaborasi), pemikiran kritis, pemikiran kreatif, nilai murni serta semangat patriotism yang tinggi.

Oleh itu, Modul e-STREAM yang merupakan aplikasi *web based* secara *online* dan *offline* telah dibangunkan oleh KEMAS sebagai panduan kepada pendidik TABIKA KEMAS mengaplikasikan proses pembelajaran berkonsepkan belajar melalui bermain, interaktif serta bermakna. Modul e-STREAM ini mengandungi 14 tema dan dilaksanakan secara rintis mulai 2018. Antara tema tersebut ialah *aviation, robotic, oil and gas* serta beberapa tema lagi.

Dalam usaha mengawal mutu modul, Jabatan Kemajuan Masyarakat menjalinkan kerjasama strategik bersama pakar akademik, pakar industri serta Badan Bukan Kerajaan (NGO) dalam bidang berkaitan tema modul tersebut seperti PETRONAS (Oil & Gas), PROTON (Automotive), UPSI, Persatuan Sekolah Belantara, ASWARA dan banyak lagi.

Inisiatif ini sekaligus dapat memupuk minat serta menginspirasi STREAM kepada kanak-kanak seawal usia di TABIKA KEMAS selari dengan kerangka konseptual STEM Malaysia, di samping menyokong inisiatif Pusat STEM Negara, Kementerian Pendidikan Malaysia meningkatkan murid yang berliterasi STEM pada semua peringkat dan seterusnya meningkatkan murid yang memilih pakej mata pelajaran STEM pada peringkat menengah atas.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 4 NOVEMBER 2020 (RABU)

SOALAN

Minta **MENTERI PENDIDIKAN** menyatakan sama ada pelajar yang mempunyai Diploma Vokasional Malaysia (DVM) boleh diterima sebagai pekerja di sektor awam dan apakah peluang pekerjaan bagi pemegang DVM dalam sektor awam.

JAWAPAN

Tuan Yang di-Pertua,

Bermula pada tahun 2012, Kementerian Pendidikan Malaysia (KPM) telah melaksanakan Transformasi Pendidikan Vokasional (TPV) bagi tujuan memartabatkan pendidikan vokasional sebagai aliran perdana. TPV telah mengubah landskap Pendidikan dan Latihan Teknikal dan Vokasional (TVET) dalam menghasilkan graduan Kolej Vokasional (KV) yang berkualiti serta mempunyai kebolehpasaran kebolehkerjaan dan kebolehgajian yang tinggi. Menurut data kebolehpasaran graduan 2019, seramai 98.84% graduan lepasan KV bekerja dalam pelbagai bidang di sektor awam dan swasta.

Untuk makluman Ahli Yang Berhormat, dalam aspek peluang pekerjaan sektor awam, graduan lulusan Diploma Vokasional Malaysia (DVM) layak untuk memohon pekerjaan di sektor perkhidmatan awam bagi Gred 29, tertakluk kepada penetapan syarat oleh Suruhanjaya Perkhidmatan Awam Malaysia (SPA). Program DVM yang telah

mendapat akreditasi penuh daripada *Malaysia Qualifications Agency* (MQA) adalah diiktiraf oleh Jabatan Perkhidmatan Awam (JPA). Sehubungan dengan itu, lepasan DVM yang layak boleh memohon pekerjaan yang diiklankan oleh SPA. Antara peluang pekerjaan bagi pemegang DVM dalam sektor awam adalah:

- a) Pemeriksa Kereta Motor
- b) Penolong Akauntan
- c) Penolong Juruaudit
- d) Penolong Pegawai Penyediaan Makanan
- e) Penolong Pegawai Rancangan Tanah
- f) Penolong Pengurus Taman/Ladang
- g) Penolong Jurutera (Elektrik, Elektronik, Sistem & Rangkaian)
- h) Penolong Arkitek Landskap
- i) Penolong Pegawai Latihan Vokasional
- j) Penolong Pegawai Penguatkuasa
- k) Penolong Pegawai Pertahanan Awam
- l) Penolong Pegawai Teknologi Makanan
- m) Penolong Pegawai Teknologi Maklumat
- n) Penolong Pemeriksa Kilang dan Jentera
- o) Penolong Penguatkuasa Bomba
- p) Penolong Pengurus Asrama
- q) Penolong Pustakawan
- r) Setiausaha Pejabat

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 4 NOVEMBER 2020 (RABU)

SOALAN

TUAN WONG HON WAI [BUKIT BENDERA] minta **MENTERI KEWANGAN** menyatakan peratusan hutang Kerajaan Malaysia berbanding GDP pada masa kini dan apakah usaha untuk mengawal peratusan ini supaya mematuhi hak atas 60 peratus yang diluluskan oleh Parlimen pada Ogos 2020.

JAWAPAN

Tuan Yang di-Pertua,

1. Sehingga akhir September 2020 berdasarkan had statutori hutang berkenaan di bawah Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020 [Akta 830] yang meliputi instrumen MGS, MGII dan MITB, nisbah hutang terkumpul Kerajaan Persekutuan kepada KDNK berada pada kadar 56.6%, iaitu masih di bawah had 60% KDNK yang ditetapkan.
2. Dalam tempoh krisis COVID-19 ini, fokus Kerajaan yang paling utama adalah untuk menyelamatkan nyawa dan melindungi kehidupan rakyat. Oleh itu, langkah-langkah rangsangan dan pemulihan ekonomi akan terus diutamakan bagi memastikan kesejahteraan rakyat, kelangsungan perniagaan dan rangsangan ekonomi. Strategi perbelanjaan Kerajaan juga

akan terus tertumpu kepada program dan projek yang memberi impak segera dan kesan pengganda tinggi kepada ekonomi.

3. Dari segi punca pembiayaan, Kerajaan mengutamakan pinjaman dalam negeri bagi memastikan risiko tukaran wang asing dan kos pinjaman yang lebih rendah. Strategi pinjaman juga akan dikawal dengan memastikan pinjaman hanya dilaksanakan berdasarkan keperluan sebenar perbelanjaan Kerajaan. Pematuhan kepada disiplin fiskal ini adalah penting bagi memastikan kedudukan kewangan negara kekal kukuh serta meningkatkan ruang fiskal pada masa hadapan.

4. Seterusnya, Kerajaan komited untuk melaksanakan agenda pembaharuan institusi, khususnya dalam memantapkan pengurusan fiskal dan hutang negara. Pada masa ini, Kerajaan mengguna pakai Kerangka Fiskal Jangka Sederhana atau dengan izin, *Medium Term Fiscal Framework* (MTFF) sebagai panduan dalam menggubal strategi ke arah konsolidasi fiskal untuk jangka masa sederhana (3 hingga 5 tahun) di samping selari dengan keutamaan dasar Rancangan Malaysia jangka panjang. Kerajaan juga dalam proses merangka Akta Tanggungjawab Fiskal (FRA) yang dijangka akan dibentangkan pada 2021 untuk mengukuhkan tadbir urus, ketelusan dan akauntabiliti dalam pengurusan fiskal.

Tuan Yang di-Pertua,

5. Dengan usaha-usaha ini, Kerajaan yakin paras hutang Kerajaan Persekutuan kepada KDNK kekal terurus di bawah had statutori yang ditetapkan. Dalam masa yang sama, Kerajaan akan sentiasa memastikan keseimbangan antara keperluan sokongan fiskal kepada pertumbuhan ekonomi dan keperluan disiplin fiskal demi kemampanan kewangan Kerajaan dalam jangka sederhana.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 4 NOVEMBER 2020 (RABU)

SOALAN

Minta **MENTERI PENDIDIKAN** menyatakan langkah-langkah yang telah dilaksanakan untuk mengurangkan jurang digital antara murid-murid bandar dan luar bandar, golongan B40, M40 serta T20 supaya kanak-kanak kurang berkemampuan tidak akan diabaikan terutama semasa penularan wabak pandemik COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP). KPM sentiasa berusaha menyediakan akses pembelajaran kepada murid secara dalam talian dan luar talian mengikut kesesuaian guru dan murid.

Namun demikian, KPM menyedari masih wujud jurang digital dalam kalangan murid yang terdiri daripada pelbagai latar belakang sosioekonomi, sama ada di kawasan bandar, luar bandar ataupun kawasan pedalaman. Berdasarkan Kajian Kesiediaan Murid dalam Pembelajaran Secara dalam Talian yang telah dilaksanakan pada 28 Mac hingga 2 April 2020, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian. Kajian ini melibatkan 670,118 responden yang terdiri daripada ibu bapa kepada 893,331 murid.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti yang bersesuaian akses internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Walau bagaimanapun, setelah sekolah dibuka semula secara berperingkat mulai 24 Jun 2020, semua murid dapat kembali berpeluang mengikuti pembelajaran secara bersemuka. Ini membolehkan murid memaksimumkan masa untuk belajar bagi mencapai tahap penguasaan minimum dalam setiap mata pelajaran atau sebagai persediaan untuk menduduki peperiksaan.

Bagi sekolah-sekolah yang terpaksa ditutup semula, murid perlu meneruskan pembelajaran di rumah. Dalam situasi kali ini, didapati murid dan guru lebih bersedia kerana mereka telah mempunyai pengalaman melaksanakan Pengajaran dan Pembelajaran (PdP) di rumah belajar

dalam tempoh PKP sebelum ini. Dalam melaksanakan tanggungjawab ini, guru komited dan berusaha bersungguh-sungguh untuk memastikan murid tidak ketinggalan dalam pembelajaran.

Sebagai langkah meningkatkan keberkesanan pelaksanaan PdP di rumah, khususnya bagi sekolah-sekolah yang ditutup atau sekolah yang melaksanakan Model Pembukaan Sekolah Secara Penggiliran, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum, selaras dengan pembelajaran norma baharu.

Untuk makluman Ahli Yang Berhormat, bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, PdP turut dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid mengikut kesesuaian. Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melukis sesuatu konsep.

Buat masa ini, KPM sedang merangka strategi pelaksanaan yang komprehensif dalam memperkasa pendidikan digital negara. KPM akan melaksanakan penambahbaikan dari semasa ke semasa bagi memperkukuh pelaksanaan pembelajaran dalam talian, terutamanya dari segi peranti, capaian, sumber dan kebolehcapaian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 4 NOVEMBER 2020 (RABU)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan bilangan dan jumlah projek-projek rundingan terus yang telah diluluskan di bawah Kerajaan Barisan Nasional (Mei 2013 – April 2018) dan Kerajaan Perikatan Nasional (Februari 2020 – terkini), termasuklah senarai projek-projek tersebut.

JAWAPAN

Tuan Yang di-Pertua,

Untuk makluman Yang Berhormat,

Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:

Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;

- i. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- ii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki
- iii. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- iv. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat

Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.

Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 4 NOVEMBER 2020 (RABU)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan kedudukan bantuan kewangan yang dipertimbangkan untuk syarikat penerbangan tempatan seperti MAS, AirAsia dan Firefly untuk memastikan operasi perniagaan dapat dikekalkan demi menjaminkan pekerjaan staf. Nyatakan bilangan staf setiap syarikat tersebut.

JAWAPAN

Tuan Yang di-Pertua,

Untuk makluman Ahli Dewan, Kerajaan komited membantu semua pihak yang terjejas dengan penularan wabak COVID-19 ini. Walau bagaimanapun, pada masa ini Kerajaan tidak terlibat dalam pelan menyelamatkan mana-mana syarikat termasuk syarikat penerbangan komersial memandangkan Kerajaan perlu memastikan apa-apa bantuan yang diberikan terutamanya daripada segi kewangan mempunyai kerangka kerja dan objektif yang jelas. Justeru itu, sebarang cadangan pemulihan kewangan syarikat adalah tertakluk kepada pertimbangan dan kelulusan Lembaga Pengarah dan pemegang saham syarikat masing-masing.

Tuan Yang di-Pertua,

Mengambil kira kesan krisis ekonomi semasa yang menyeluruh, Kerajaan berpandangan pemberian bantuan wajar dilaksanakan secara meluas dan tidak terhad kepada syarikat penerbangan sahaja. Bantuan ini telah dilaksanakan oleh Kerajaan melalui beberapa pakej rangsangan dan pelan pemulihan ekonomi seperti PRIHATIN, PRIHATIN PKS+, PENJANA dan KITA PRIHATIN yang keseluruhannya bernilai RM305 bilion bagi membantu pekerja dan rakyat yang terjejas pendapatan serta perniagaan yang mengalami masalah aliran tunai termasuk syarikat penerbangan tempatan seperti yang dibangkitkan oleh YB Bagan.

Selain itu, di peringkat pemegang saham pula, Khazanah Nasional Berhad (KNB) selaku pemilik tunggal Malaysia Aviation Group Bhd (MAGB) iaitu syarikat induk kepada Malaysia Airlines Bhd (MAB) dan FlyFirefly Sdn Bhd menyokong penuh usaha pemulihan kewangan syarikat penerbangan tersebut. Namun demikian sebarang suntikan dana oleh KNB kepada MAGB adalah tertakluk kepada sejauh mana pemiutang bersedia untuk mengurangkan bebanan hutang yang ditanggung oleh MAGB. Pengurangan bebanan hutang akan membolehkan MAGB memperkukuhkan kembali kedudukan kewangannya dan seterusnya mampu terus maju pada masa hadapan.

Tuan Yang di-Pertua,

Pada masa ini bilangan kakitangan MAB, Firefly dan AirAsia adalah berjumlah lebih kurang 20,000 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah status rancangan pembinaan rumah PPR di Pekan Melalap Tenom.

JAWAPAN

Tuan Yang di-Pertua,

1. Untuk makluman Yang Berhormat, berhubung status pembinaan rumah Program Perumahan Rakyat (PPR) di Pekan Baru Melalap Tenom, Kementerian Perumahan dan Kerajaan Tempatan (KPKT) telah mengemukakan permohonan cadangan projek tersebut kepada Unit Perancang Ekonomi (EPU), Jabatan Perdana Menteri (JPM) sebagai salah satu cadangan projek baharu untuk dilaksanakan di bawah Rancangan Malaysia Ke-12 (RMKe-12) *Rolling Plan 1*, 2021. Walau bagaimanapun, permohonan ini adalah tertakluk kepada pertimbangan dan kelulusan pihak EPU dan Kementerian Kewangan Malaysia.

2. Untuk makluman Yang Berhormat seterusnya, projek ini akan dikenali sebagai Program Rumah Malaysia (Sewa) Pekan Baru Melalap, Tenom, Sabah selaras dengan polisi Kementerian di mana pelaksanaan projek PPR baharu di bawah RMKe-12 akan dikenali sebagai Program Rumah Malaysia (Sewa).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
[LEDANG]**

TARIKH : 4 NOVEMBER 2020 (RABU)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan jelaskan perincian kadar fungsi Pusat Internet Komuniti (PIK) terkini terutamanya bagi kawasan luar bandar dan unjuran keberkesanan usaha pemerkasaan PIK terutamanya kepada sasaran utama iaitu golongan belia.

JAWAPAN

Tuan Yang di-Pertua,

1. Untuk makluman Ahli Yang Berhormat, Pusat Internet Komuniti (PIK) telah dilaksanakan oleh Suruhanjaya Komunikasi dan Multimedia Malaysia (SKMM) sejak tahun 2007. Sehingga kini, terdapat sebanyak 873 PIK yang menyediakan perkhidmatan kepada hampir 15.4 juta rakyat. Pelaksanaan PIK adalah untuk memenuhi objektif utama dalam merapatkan jurang digital dengan penyediaan perkhidmatan capaian jalur lebar secara kolektif kepada golongan masyarakat bandar dan juga luar bandar selain daripada berperanan sebagai pembangunan modal insan bagi masyarakat setempat termasuk golongan belia.

2. PIK menawarkan kursus-kursus latihan berkaitan ICT, keusahawanan dan Sains, Teknologi, Kejuruteraan dan Matematik (STEM), di samping menjalankan beberapa Program Penglibatan

Komuniti, Pembangunan Kandungan Tempatan serta menawarkan perkhidmatan-perkhidmatan tambahan sebagai usaha kolektif dalam membantu meningkatkan kemahiran sosio-ekonomi dan modal insan masyarakat luar bandar.

3. Diantara program-program ICT dan STEM yang dijalankan di PIK adalah pengaturcaraan, aplikasi robotik/IoT, penciptaan aplikasi mudah alih, animasi, penerbitan video, pencetakan 3 dimensi (3D) dan kelas-kelas pembelajaran dalam talian seperti eKelas dan JomStudi. Manakala bagi program-program keusahawanan pula, PIK mengetengahkan latihan-latihan seperti strategi perniagaan, e-dagang dan lain-lain bagi menarik minat lebih ramai belia untuk menceburi bidang perniagaan dalam talian.

4. Selaras dengan itu, program pembangunan keusahawanan telah menjadi salah satu bidang tumpuan utama ke arah memacu usahawan berkemampuan digital yang inovatif, lestari dan inklusif. Sehingga kini, terdapat 20 ribu usahawan berjaya dilahirkan dengan bantuan PIK melalui program-program latihan keusahawanan yang dilaksanakan; yang mana 66% peratus daripadanya berjaya memperoleh pendapatan melebihi RM500 sebulan selepas mengikuti latihan keusahawanan berbanding sebelumnya hanya 25% sahaja yang memperoleh pendapatan melebihi RM500 sebulan. Ini termasuk program-program usahasama di antara beberapa agensi seperti MARA, FAMA dan landasan e-pasaran atau "*e-marketplace*" seperti Agrobazaar, LAZADA dan Shopee. Sebanyak 40% pengguna PIK adalah belia yang telah mendapat manfaat daripada pelbagai perkhidmatan dan pengisian program di PIK.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 4 NOVEMBER 2020 (RABU)

SOALAN

Minta **MENTERI TENAGA DAN SUMBER ASLI** menyatakan bagaimana aktiviti pemburuan haram mampu berlaku secara luas di Johor dan apakah tindakan yang telah diambil oleh Kementerian setakat ini untuk mengurangkan masalah ini.

JAWAPAN

Tuan Yang di-Pertua,

1. Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) amat mengambil berat terhadap isu pemburuan haram yang didakwa berlaku secara meluas di negeri Johor. Antara faktor utama yang menyebabkan perkara ini berlaku adalah:

- a) permintaan yang tinggi ke atas hidupan liar bagi pelbagai tujuan terutamanya untuk dijadikan sebagai makanan eksotik serta binatang peliharaan kesayangan;
- b) kedudukan kawasan hutan yang dikelilingi oleh kawasan perladangan dan pertanian memudahkan kegiatan pemburu-pemburu haram; dan

- c) kedudukan negeri Johor yang berhampiran dengan negara jiran serta jajaran pantai yang panjang memudahkan aktiviti penyeludupan hidupan liar.
2. Pelbagai tindakan telah diambil bagi mengawal pemburuan haram tersebut, antaranya:
- a) menjalankan operasi penguatkuasaan bersepadu yang dikenali sebagai Operasi Bersepadu Khazanah (OBK) dengan penglibatan Polis Diraja Malaysia (PDRM) dan pelbagai agensi lain seperti Jabatan Perhutanan Negeri Johor, Perbadanan Taman Negeri Johor (PTNJ) dan Badan Bukan Kerajaan (NGO) iaitu *Wildlife Conservation Society* (WCS). OBK dilaksanakan secara *boots on the ground* dengan rondaan berterusan di habitat hidupan liar termasuk Hutan Simpanan Kekal (HSK) bagi membanteras pencerobohan, pembalakan haram, pemburuan hidupan liar dan menghapuskan jerat. Sehingga kini, sebanyak 16 siri operasi telah dijalankan di negeri Johor dalam tahun 2020;
 - b) melaksanakan inisiatif *Biodiversity Protection and Patrolling Programme* (BP3), mulai Julai 2020, di mana seramai 6 orang Veteran Angkatan Tentera Malaysia (ATM) dan 5 orang masyarakat Orang Asli (OA) telah lantik secara *contract for service* (CFS) sehingga hujung tahun 2020 bagi menjalankan aktiviti penguatkuasaan di Taman Negara Endau-Rompin Johor;
 - c) menjalankan risikan dan mendapatkan maklumat daripada orang ramai mengenai kumpulan dan aktiviti pemburuan haram di Johor; dan
 - d) bekerjasama dengan pasukan Polis Marin Johor bagi membenteras aktiviti penyeludupan hidupan liar ke negara-negara jiran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 4 NOVEMBER 2020 (RABU)

SOALAN

TUAN WONG LING BIU [SARIKEI] minta **MENTERI KEWANGAN** menyatakan adakah pegawai dari Lembaga Hasil Dalam Negeri diberikan ganjaran sekiranya mereka mengutip lebih banyak cukai. Adakah mereka dibayar komisyen atau bonus mengikut jumlah kutipan.

JAWAPAN

Tuan Yang di-Pertua,

Pegawai Lembaga Hasil Dalam Negeri Malaysia (LHDNM) diberikan ganjaran dalam bentuk bayaran insentif prestasi tahunan tertakluk kepada kelulusan Lembaga Pengarah LHDNM dan Kementerian Kewangan yang akan menilai pencapaian Key Performance Indicator (KPI) LHDNM secara keseluruhan di mana ia merangkumi empat belas (14) proses utama LHDNM. Sekiranya bayaran insentif kepada LHDNM diluluskan, bayaran insentif kepada pegawai pula dilaksanakan secara differentiated bonus berasaskan pencapaian sebenar individu dan prestasi keseluruhan pegawai dalam tahun penilaian.

Pemberian bayaran insentif adalah bertujuan untuk mengekalkan semangat dan motivasi pegawai dan kakitangan LHDNM supaya lebih efektif, cekap dan cemerlang dalam menjalankan fungsi mengutip hasil cukai negara demi pembangunan negara yang berdaya saing dan berterusan dalam jangka masa panjang.

Namun begitu, prestasi keseluruhan tahunan LHDNM perlu diteliti dan dinilai sebelum sebarang jumlah bayaran insentif prestasi tahunan dimuktamadkan. Faktor persekitaran ekonomi dan kedudukan semasa kewangan Kerajaan adalah antara elemen penting yang diambilkira sebelum keputusan mengenai bayaran insentif dibuat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN AHMAD JOHNNIE BIN ZAWAWI [IGAN]

TARIKH : 4 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan apakah perancangan jangka panjang Kementerian untuk menaikkan taraf ekonomi penduduk luar bandar di kawasan Parlimen Igan dan nyatakan program yang akan dilaksanakan.

JAWAPAN

Tuan Yang di-Pertua,

Untuk makluman Yang Berhormat, sepanjang tahun 2020, Kerajaan melalui Kementerian Pembangunan Luar Bandar telah memperuntukkan sejumlah RM15.424 juta untuk melaksanakan enam (6) projek di Parlimen Igan. Peruntukan ini turut meliputi program peningkatan ekonomi seperti Projek Bersepadu Pembangunan Kampung (PROSPEK), Program Tanam Semula Getah (RISDA) dan pembiayaan perniagaan MARA.

Selaras dengan hasrat Dasar Pembangunan Luar Bandar 2030 (DPLB 2030), fokus Kementerian adalah untuk meningkatkan kesejahteraan penduduk luar bandar dari segi ekonomi, sosial, budaya dan persekitaran. Justeru, Rancangan Malaysia Ke-12 (RMKe-12) akan memberi tumpuan kepada beberapa inisiatif untuk mempelbagaikan sumber pendapatan melalui aktiviti pertanian seperti Aktiviti Ekonomi Tambahan (AET), Program Peningkatan Pendapatan (PPP), pembangunan tanah terbiar dan *smart farming* di bawah PROSPEK serta memanfaatkan ekonomi digital melalui pemeraksanaan Pusat Komuniti Desa (PKD) dan pemeraksanaan *DesaMall@KPLB*. Hasrat ini disokong dengan pemberian latihan kepada penduduk luar bandar melalui Program Latihan Kemahiran dan Kerjaya (PLKK) serta program-program keusahawanan anjuran agensi KPLB seperti KEMAS, MARA dan Lembaga Kemajuan Wilayah (LKW).

Kementerian sedang dalam proses meneliti cadangan program-program baharu untuk dilaksanakan di bawah Rancangan Malaysia Kedua Belas (RMKe-12) khusus untuk meningkatkan pendapatan penduduk luar bandar, seperti mana yang telah digariskan di bawah DPLB 2030. Oleh itu, program peningkatan ekonomi penduduk di Sarawak khasnya di Parlimen Igan akan mengambil kira keutamaan sebagaimana dikemukakan oleh Kerajaan Negeri Sarawak.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan dalam skim perumahan membina satu juta unit rumah mampu milik dalam tempoh 10 tahun, berapa ramai anak muda telah memanfaatkan daripada skim ini, mengikut pecahan umur, kaum, pendapatan dan negeri daripada tahun 2018-2020.

JAWAPAN

Tuan Yang di-Pertua,

1. Untuk makluman Yang Berhormat, sasaran 1 juta Rumah Mampu Milik (RMM) merupakan Manifesto Kerajaan terdahulu. Pada masa ini, Kementerian Perumahan dan Kerajaan Tempatan (KPKT) memfokuskan penyediaan RMM yang berkualiti dan berdaya huni. Mulai Julai 2018 hingga 30 Jun 2020, sebanyak **546,755** unit rumah mampu milik sedang dalam pelbagai peringkat pelaksanaan. Jumlah ini merangkumi 327,922 unit rumah dalam perancangan, 163,337 unit rumah dalam pembinaan dan 55,496 unit rumah telah disiapkan oleh 3 agensi penyedia perumahan yang melibatkan Kerajaan Persekutuan, Kerajaan Negeri dan pemaju swasta.

2. Program perumahan yang diselaraskan di bawah KPKT adalah seperti berikut:

- i) Program Perumahan Rakyat (PPR) & Rumah Transit;
- ii) Perumahan Penjawat Awam Malaysia (PPAM);
- iii) Perumahan PR1MA; dan
- iv) Program Perumahan Syarikat Perumahan Negara Berhad (SPNB).

3. Untuk makluman Yang Berhormat, mulai tahun 2002 sebanyak **83,699** unit rumah PPR telah diisi di seluruh negara yang telah memberi manfaat kepada isi rumah dari golongan B40 berpendapatan RM3,000 sebulan ke bawah termasuk golongan muda. Buat masa ini KPKT tiada maklumat lengkap pengisian PPR mengikut umur dan kaum, memandangkan majoriti pengisian PPR dilaksanakan oleh pihak kerajaan Negeri masing-masing. Perincian pengisian PPR mengikut negeri adalah seperti berikut:

MAKLUMAT PENGISIAN PPR MENGIKUT NEGERI (SEHINGGA 30 SEPTEMBER 2020)

BIL	NEGERI	BIL. UNIT DIBINA	JUMLAH UNIT DIISI	BIL. UNIT KOSONG / BELUM DIISI
1	Johor	9,745	8,630	1,115
2	Kedah	3,910	1,908	2,002
3	Kelantan	2,568	1,385	1,183
4	Melaka	1,436	1,389	47
5	Negeri Sembilan	670	561	109
6	Pahang	3,668	3,520	148
7	Perak	1,014	937	77
8	Perlis	1,428	1,331	97
9	Pulau Pinang	999	833	166
10	Sabah	21,699	19,530	2,169
11	Sarawak	4140	3,978	162
12	Selangor	5184	4,750	434
13	Terengganu	1,002	967	35
14	W.P. Kuala Lumpur	34,862	33,980	882
	JUMLAH	92,325	83,699	8,626

4. Manakala bagi **Perumahan Penjawat Awam Malaysia (PPAM)**, jumlah tawaran dari 2018 sehingga 2020 kepada anak muda (maksimum umur 40 tahun) ialah **8,207** dengan pecahan umur, kaum, pendapatan dan negeri seperti berikut:

(a) Pecahan Mengikut Julat Umur

Julat Umur	Bil. Unit PPAM
25 dan ke bawah	829
26-30	3,381
31-35	2,726
36-40	1,271
JUMLAH	8,207

(b) Pecahan Mengikut Pecahan Kaum

Kaum	Bil. Unit PPAM
Melayu	6,144
Cina	962
India	295
Lain-lain	806
JUMLAH	8,207

(c) Pecahan Mengikut Julat Pendapatan

Julat Pendapatan	Bil. Unit PPAM
2,000 dan ke bawah	1,253
2,001-4,000	4,894
4,001-6,000	1,713
6,001-8,000	286
8,001 dan ke atas	61
JUMLAH	8,207

(d) Pecahan Mengikut Negeri

Negeri	Bil. Unit PPAM
Putrajaya	129
Johor	764
Kedah	1,025
Kelantan	202
K.Lumpur	1,329
Labuan	35
Melaka	184
N. Sembilan	241
Pahang	579
Perak	260
Perlis	96
P.Pinang	344
Sabah	769
Sarawak	506
Selangor	1,546
Terengganu	198
JUMLAH	8,207

5. Untuk makluman Yang Berhormat juga, melalui **Perumahan PR1MA**, sehingga Oktober 2020, sebanyak **10,391** unit rumah telah dijual kepada golongan anak muda di bawah skim perumahan Perbadanan PR1MA Malaysia (PR1MA). Berikut adalah pecahan bilangan anak muda yang telah menerima manfaat daripada skim perumahan ini mengikut pecahan umur, kaum, pendapatan dan negeri:

(a) Pecahan Mengikut Julat Umur

Julat Umur (Tahun)	Bil. Unit PR1MA
21-25	683
26-30	4,106
31-35	3,543
36-40	2,059
JUMLAH	10,391

(b) Pecahan Mengikut Kaum

Kaum	Bil. Unit PR1MA
Melayu	6,359
Cina	2,614
India	633
Bumiputera (Sabah & Sarawak)	758
Lain – lain	27
JUMLAH	10,391

(c) Pecahan Mengikut Julat Pendapatan

Julat Pendapatan (RM)	Bil. Unit PR1MA
2,500 – 3,500	2,864
3,501 – 4,500	5,319
4,501 – 5,500	1,889
5,501 – 6,500	228
>6,501	91
JUMLAH	10,391

(d) Pecahan Mengikut Negeri

Negeri	Bil. Unit PR1MA
Johor	702
Kedah	2,261
Kelantan	147
Kuala Lumpur	762
Melaka	822
Negeri Sembilan	389
Pahang	440
Perak	1,391
Perlis	41
Pulau Pinang	271
Sabah	769
Sarawak	1,290
Selangor	1,106
JUMLAH	10,391

6. Untuk makluman Yang Berhormat, berdasarkan senarai **program perumahan SPNB**, sebanyak 5,771 unit rumah telah dimiliki dari tahun 2018 hingga kini. Daripada jumlah tersebut sebanyak **3,747** unit dimiliki oleh golongan belia di bawah 40 tahun. Pecahan mengikut umur, kaum, pendapatan dan negeri adalah seperti berikut:

(a) Pecahan Mengikut Julat Umur

Julat Umur	Bil. Unit
18 – 20 tahun	0
21 – 30 tahun	915
31 – 40 tahun	2,832
JUMLAH	3,747

(b) Pecahan Mengikut Kaum

Kaum	Bil. Unit
Melayu	3,629
Cina	53
India	13
Lain-Lain	52
JUMLAH	3,747

(c) Pecahan Mengikut Julat Pendapatan

Julat Pendapatan	Bil. Unit
RM1,000 – RM2,000	115
RM2,001 – RM3,000	1,478
RM3,001 – RM4,000	2,135
RM4,001 – RM5,000	19
RM5,001 ke atas	0
JUMLAH	3,747

(d) Pecahan Mengikut Negeri

Negeri	Bil. Unit
Selangor	180
Melaka	231
Perlis	126
Kedah	675
Pulau Pinang	18
Perak	182
Pahang	434
Negeri Sembilan	292
Johor	280
Terengganu	599
Kelantan	366
Sabah	335
Sarawak	29
JUMLAH	3,747

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN ISNARAISSAH MUNIRAH MAJILIS
[KOTA BELUD]**

TARIKH : 4 NOVEMBER 2020 (RABU)

SOALAN

Minta **MENTERI TENAGA DAN SUMBER ASLI** menyatakan status pengembalian SESB kepada Kerajaan Negeri Sabah yang baru sama ada akan diteruskan atau tidak.

JAWAPAN

Tuan Yang di-Pertua,

1. Kerajaan Persekutuan komited untuk meneruskan penyerahan kuasa pembekalan elektrik dan Sabah Electricity Sdn. Bhd. (SESB) kepada Kerajaan Negeri Sabah dan memulakan rundingan dengan Kerajaan Negeri Sabah yang baharu dibentuk.
2. Bagi tujuan ini, Kementerian akan memulakan rundingan penyerahan pembekalan elektrik dan SESB kepada Kerajaan Negeri Sabah setelah cadangan balas terhadap permohonan-permohonan Kerajaan Negeri Sabah diluluskan oleh Jemaah Menteri.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

TARIKH : 4 NOVEMBER 2020 (RABU)

SOALAN

Minta **MENTERI PERTAHANAN** menyatakan bilakah Kerajaan akan menggantikan kapal logistik (MPCSS), KD Mahawangsa (beroperasi sejak 1983) dan KD Indera Sakti (beroperasi sejak 1980) yang uzur, memandangkan tuntutan keperluan Ops Benteng dari Langkawi hingga ke Perairan Timur Sabah semakin mendesak.

JAWAPAN

Tuan Yang di-Pertua,

Dalam tempoh Rancangan Malaysia Ke-12 (2021-2025), Kementerian Pertahanan telah merancang perolehan 2 buah *Multi Role Support Ship* (MRSS) yang dijangka bermula pada tahun 2024. Perolehan aset ini akan menggantikan KD MAHAWANGSA dan KD SRI INDERASAKTI yang telah usang agar dapat memenuhi keperluan operasi ATM melalui kemampuan *strategic sealift* antara Semenanjung Malaysia dengan Sabah dan Sarawak; serta bantuan logistik dan kemanusiaan di peringkat antarabangsa apabila diperlukan. Walau bagaimanapun, perolehan aset ini tertakluk kepada kemampuan kewangan kerajaan.

Tentera Laut Diraja Malaysia (TLDM) telah memperkenalkan Program Transformasi Armada TLDM 15ke5 pada November 2017, untuk mewujudkan pengurusan keupayaan Armada TLDM yang kredibel, dinamik dan ekonomikal. Program jangka panjang sehingga tahun 2050 dijangka akan dapat mengatasi cabaran dan kekangan yang dihadapi TLDM bagi pengurusan aset yang usang melalui pengurangan 15 kelas kapal kepada hanya 5 kelas sahaja iaitu *Littoral Combat Ship* (LCS), *Littoral Mission Ship* (LMS), *Multi Role Support Ship* (MRSS), *New Generation Patrol Vessel* (NGPV) dan Kapal Selam.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : TUAN NIK NAZMI BIN NIK AHMAD
[SETIAWANGSA]
TARIKH : 4 NOVEMBER 2020 (RABU)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI PENGAJIAN TINGGI** menyatakan apakah langkah yang diambil untuk membantu pelajar dari luar kawasan dan tidak mempunyai akses internet yang baik yang belajar di universiti awam selepas pembatalan pendaftaran mahasiswa pada 27 September 2020.

JAWAPAN

Tuan Yang di-Pertua,

Susulan pengumuman Penangguhan Pendaftaran Secara Fizikal atau Bersemuka Pelajar IPT pada 2 Oktober 2020 lalu, Kementerian telah mencadangkan agar semua urusan pendaftaran pelajar dilaksanakan secara dalam talian. Kementerian maklum bahawa ramai pelajar dan ibubapa berasa khuatir dan gusar, terutamanya untuk pelajar meneruskan sesi Pengajaran dan Pembelajaran (PdP) secara dalam talian. Namun keputusan penting itu perlu diambil oleh kementerian demi menjaga kebajikan dan keselamatan pelajar.

Bagi membantu pelajar IPT mendapatkan akses internet dan memastikan sesi Pengajaran dan Pembelajaran (PdP) mereka secara dalam talian dapat dijalankan dengan baik, Kementerian dengan kerjasama Kementerian Komunikasi dan Multimedia Malaysia (KKMM) telah menyalurkan maklumat 871 lokasi kemudahan pusat internet di bawah seliaan KKMM kepada universiti-universiti awam. Pusat-pusat internet ini boleh diakses oleh semua pelajar di kawasan bandar dan luar bandar seluruh Malaysia termasuk di Sabah dan Sarawak. Setiap pusat internet tersebut mempunyai 20 buah komputer, perkhidmatan berbayar seperti fotostat, pencetak, pengimbas, *laminat* dengan izin dan perkhidmatan-perkhidmatan lain yang membantu memudahkan urusan pembelajaran pelajar.

Selain itu, Kementerian juga menyediakan bantuan berbentuk sumbangan pelan data bagi capaian internet kepada 320,396 pelajar daripada kalangan keluarga B40 di universiti awam. Seramai 225,784 pelajar telah dan akan menerima bantuan dalam bentuk simkad manakala 94,612 pelajar akan menerima bantuan sama ada berbentuk tunai atau baucar pembelian pelan data mengikut syarikat telekomunikasi pilihan masing-masing. Bantuan ini dibiayai melalui sumber dana dalaman universiti awam dan tabung kebajikan pelajar dengan anggaran peruntukan keseluruhan berjumlah RM24 juta.

Selain bantuan dan sumbangan dalam bentuk pelan data, kementerian turut menyediakan bantuan berbentuk pembiayaan kepada 8,965 pelajar daripada kalangan keluarga B40 untuk memiliki peranti. Daripada jumlah tersebut, seramai 5,965 pelajar akan menerima sumbangan berbentuk komputer riba, 300 pelajar menerima bantuan berbentuk pinjaman kewangan untuk pembelian komputer dan selebihnya 2,700 pelajar menerima bantuan berbentuk tunai atau baucar bagi tujuan pembelian peranti. Bantuan ini dibiayai melalui sumber dana universiti awam sendiri; tabung kebajikan pelajar; zakat daripada Tabung Haji; wakaf; dan sumbangan daripada agensi dan pihak lain dengan anggaran peruntukan sebanyak RM13.4 juta.

Syarikat-syarikat pengeluar peranti juga turut menawarkan diskaun istimewa khas kepada semua pelajar IPT untuk mendapatkan peranti keluaran syarikat mereka. Diskaun khas ini hanya ditawarkan kepada pelajar IPT sahaja bagi membantu mengurangkan kos yang perlu ditanggung pelajar untuk mendapatkan peranti.

Dalam usaha untuk meringankan beban 76,153 pelajar baharu bagi Sesi Akademik 2020/2021 untuk menanggung kos bagi mengikuti PdP secara dalam talian, kementerian turut menawarkan pemberian bantuan tunai sebanyak RM50 kepada setiap pelajar tersebut. Bantuan ini melibatkan peruntukan berjumlah RM3.8 juta. Melalui insentif yang diberikan ini, beban terutamanya kepada pelajar baharu untuk menanggung kos pembelajaran secara dalam talian dapat dikurangkan.

Bagi memastikan kelangsungan atau kemampuan untuk pelajar-pelajar terutamanya daripada kalangan keluarga B40 untuk meneruskan PdP secara dalam talian, kementerian dengan kerjasama Yayasan Sukarelawan Siswa (YSS) juga telah melancarkan inisiatif dengan izin *crowdfunding* melalui Tabung Prihatin Siswa. Inisiatif ini mengajak pihak luar untuk turut sama menyalurkan sumbangan bagi membantu meringankan kesulitan pelajar yang berkeperluan dalam meneruskan sesi PdP mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 04 NOVEMBER 2020 (RABU)

SOALAN

Minta **MENTERI PENDIDIKAN** menyatakan apakah langkah yang diambil untuk mengatasi masalah tiada akses kemudahan internet kepada pelajar-pelajar yang tinggal di kawasan pedalaman Sarawak dan daripada keluarga yang kurang berkemampuan membeli peranti mudah alih untuk memastikan sesi Pembelajaran dan Pemudahcaraan (PdPc) dalam talian berjalan lancar sejak pelaksanaan PKP dan apakah rancangan Kementerian untuk kemudahan internet di Sarawak pada masa depan.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP). KPM sentiasa berusaha menyediakan akses pembelajaran kepada murid secara dalam talian dan luar talian mengikut kesesuaian guru dan murid.

Namun demikian, KPM menyedari masih wujud jurang digital dalam kalangan murid yang terdiri daripada pelbagai latar belakang sosioekonomi di seluruh negara termasuk di Sarawak, sama ada di kawasan bandar, luar bandar ataupun kawasan pedalaman. Berdasarkan Kajian Kesediaan Murid dalam Pembelajaran Secara dalam Talian yang telah dilaksanakan pada 28 Mac hingga 2 April 2020, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian. Kajian ini melibatkan 670,118 responden yang terdiri daripada ibu bapa kepada 893,331 murid.

Dapatan kajian ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti yang bersesuaian dan akses Internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid.

Walau bagaimanapun, setelah sekolah dibuka semula secara berperingkat mulai 24 Jun 2020, semua murid dapat kembali berpeluang mengikuti pembelajaran secara bersemuka. Ini membolehkan murid memaksimumkan masa untuk belajar bagi mencapai tahap penguasaan minimum dalam setiap mata pelajaran atau sebagai persediaan untuk menduduki peperiksaan.

Bagi sekolah-sekolah yang terpaksa ditutup semula, murid perlu meneruskan pembelajaran di rumah. Dalam situasi kali ini, didapati murid dan guru lebih bersedia kerana mereka telah mempunyai pengalaman

melaksanakan Pengajaran dan Pembelajaran (PdP) di rumah belajar dalam tempoh PKP sebelum ini. Dalam melaksanakan tanggungjawab ini, guru komited dan berusaha bersungguh-sungguh untuk memastikan murid tidak ketinggalan dalam pembelajaran.

Sebagai langkah meningkatkan keberkesanan pelaksanaan PdP di rumah, khususnya bagi sekolah-sekolah yang ditutup atau sekolah yang melaksanakan Model Pembukaan Sekolah Secara Penggiliran, KPM telah menyediakan Manual Pengajaran dan Pembelajaran di Rumah (PdPR). Ini adalah sebagai panduan kepada guru dalam melaksanakan PdP secara berstruktur dan terancang supaya murid dapat mengikuti pembelajaran di rumah dengan optimum, selaras dengan pembelajaran norma baharu.

Untuk makluman Ahli Yang Berhormat, bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, PdP turut dilaksanakan melalui siaran TV Pendidikan di saluran TV Okey RTM dan Tutor TV Astro. Di samping itu, terdapat juga guru yang melaksanakan PdP melalui serahan bahan pembelajaran kepada murid mengikut kesesuaian. Murid-murid juga boleh menggunakan buku teks cetak dan buku aktiviti sebagai bahan rujukan dan melaksanakan aktiviti seperti mencatat nota, membuat rumusan atau melukis sesuatu konsep.

Buat masa ini, KPM sedang merangka strategi pelaksanaan yang komprehensif dalam memperkasa pendidikan digital negara. KPM akan melaksanakan penambahbaikan dari semasa ke semasa bagi memperkukuh pelaksanaan pembelajaran dalam talian, terutamanya dari segi peranti, capaian, sumber dan kebolehcapaian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN GOBIND SINGH DEO
[PUCHONG]**

TARIKH : 4 NOVEMBER 2020 (RABU)

SOALAN

TUAN GOBIND SINGH DEO [PUCHONG] minta **MENTERI KOMUNIKASI DAN MULTIMEDIA** menyatakan apakah status pelaksanaan pelan NFCP ataupun JENDELA. Huraikan secara spesifik pencapaiannya setakat sekarang.

JAWAPAN

Tuan Yang di-Pertua,

1. Untuk makluman Ahli Yang Berhormat, Pelan Jalinan Digital Negara atau JENDELA merupakan perancangan kesinambungan kepada Pelan Gentian Optik dan Kesalinghubungan Negara (NFCP), yang dirangka sebelum pandemik COVID-19 melanda. Perubahan norma baharu pasca COVID-19 menyaksikan perubahan ketara corak penggunaan Internet dan perkembangan ini menambah kebergantungan terhadap aspek digital untuk pembangunan semula masyarakat dan ekonomi.

2. Melalui pelan JENDELA, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

3. Sasaran fasa pertama yang bermula sekarang sehingga tahun 2022 adalah:

- a. Membolehkan penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;
- b. Perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. Mempertingkatkan kelajuan purata jalur lebar mudah alih daripada 25Mbps kepada 35Mbps.

4. Pelan JENDELA juga akan melibatkan penamatan rangkaian 3G secara berperingkat sehingga akhir tahun 2021 untuk mengoptimumkan penggunaan spektrum bagi pemantapan rangkaian teknologi 4G.

5. Bagi fasa kedua yang selaras dengan perancangan Rancangan Malaysia ke-12 (RMKe-12) pula akan melibatkan peralihan kepada teknologi 5G selepas platform yang kukuh di dalam fasa pertama ini dapat dicapai.

6. Untuk makluman Ahli Yang Berhormat, status pelaksanaan projek-projek di bawah pelan JENDELA di seluruh negara semenjak dua bulan pelaksanaanya antaranya adalah seperti berikut :

- a. Sebanyak 260,518 premis daripada sasaran lebih 2.5 juta premis telah disediakan dengan capaian gentian optik;
- b. Sebanyak 518 menara komunikasi daripada 2,601 menara komunikasi baharu yang akan dibina adalah berstatus telah siap; dan
- c. Sebanyak 12,091 alat pemancar komunikasi telah dinaik taraf kepada 4G daripada sasaran 20,803 alat pemancar komunikasi di menara sedia ada yang akan dinaik taraf.

7. Secara ringkasnya, selepas dua (2) bulan pelaksanaan pelan JENDELA, liputan 4G bagi kawasan berpenduduk telah meningkat dari 91.8% kepada 92.03% dan sebanyak 260,518 premis telah mendapat capaian jalur lebar berkelajuan gigabit daripada 350 ribu premis yang disasarkan pada tahun ini.

8. Bagi tujuan penamatan rangkaian teknologi 3G, satu Jawatankuasa Penamatan Rangkaian 3G yang dianggotai oleh pihak Kementerian Komunikasi dan Multimedia Malaysia (KKMM), Suruhanjaya Komunikasi dan Multimedia Malaysia (SKMM), syarikat pemberi perkhidmatan, Institut Piawaian dan Penyelidikan Perindustrian Malaysia (SIRIM), Kastam Diraja Malaysia, *Consumer Forum of Malaysia* (CFM) dan *Malaysian Technical Standards Forum Berhad* (MTSFB) telah ditubuhkan. Jawatankuasa ini akan melihat kepada keseluruhan aspek dari segi kajian, perancangan, pelaksanaan dan pemantauan dalam penamatan rangkaian teknologi 3G termasuklah migrasi rangkaian dan pelanggan serta peralatan dan peranti.

9. Kementerian bersama-sama dengan pihak SKMM serta syarikat-syarikat penyedia perkhidmatan mendukung komitmen untuk memberi pengalaman terbaik kepada rakyat dan menjana pembangunan semula negara melalui penyediaan infrastruktur komunikasi yang mampan.

10. Namun begitu, segala inisiatif pembangunan infrastruktur digital ini juga turut memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN AHMAD
[KUALA SELANGOR]**

TARIKH : 4 NOVEMBER 2020 (RABU)

SOALAN

DATUK SERI DR. HAJI DZULKEFLN AHMAD [KUALA SELANGOR] minta **MENTERI KEWANGAN** menyatakan apakah kewajaran Khazanah Nasional Berhad melalui syarikatnya UEM Berhad, yang akan membenarkan UEM Sunrise, cabang hartanahnya, bergabung dengan syarikat harta tanah lain, Eco World Development Berhad (ECW).

JAWAPAN

Tuan Yang di-Pertua,

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersil yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersil dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 4 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan tindakan yang akan diambil oleh pihak Kerajaan untuk **membanteras kegiatan pinjaman wang haram daripada ‘Ah Long’** bagi mengelakkan orang ramai daripada menjadi mangsa keganasan sindiket ‘Ah Long’.

JAWAPAN

Tuan Yang di-Pertua,

1. Untuk makluman Yang Berhormat, Akta Pemberi Pinjam Wang 1951 [Akta 400] diwujudkan bagi mengawal selia aktiviti pemberi pinjaman wang berlesen termasuklah kegiatan pemberi pinjaman wang haram atau lebih dikenali sebagai ‘Ah Long’.
2. Kerajaan sedia maklum mengenai kegiatan sindiket ‘Ah Long’ yang selalu menggunakan kekerasan untuk menuntut wang daripada peminjam-peminjam atau mangsanya. Bagi membanteras dan mengekang kegiatan ‘Ah Long’ ini, beberapa tindakan telah diambil sebagaimana berikut:

- (a) Setiap laporan polis yang diterima akan disiasat sewajarnya dan seterusnya tindakan mengesan dan menangkap Ah Long yang terlibat akan diambil untuk dihadapkan di Mahkamah;
- (b) “Op Vulture” dijalankan secara berterusan untuk mematahkan sindiket-sindiket ‘Ah Long’ dengan menangkap ketua-ketua sindiket serta ahlinya sebagai langkah pembanterasan kegiatan sindiket ini hingga ke akar umbi; dan
- (c) Pihak yang membantu atau bersubahat dengan aktiviti ‘Ah Long’ sama ada secara langsung atau tidak langsung seperti meminjamkan akaun bank atau membantu mengedarkan risalah, poster, kad pinjaman atau sepanduk juga diberkas dan dituduh di mahkamah.

3. Hasil usaha penguatkuasaan serta pencegahan yang diambil telah menunjukkan pengurangan kes di mana pada tahun 2020 sebanyak 817 kes telah dilaporkan bagi tempoh Januari hingga 15 Oktober 2020 berbanding sebanyak 1,220 kes yang dilaporkan dalam tahun 2019. Pertuduhan terhadap saspek juga telah meningkat bagi tahun 2020 kepada 349 orang berbanding 280 orang yang dituduh bagi tahun 2019. Usaha ini akan terus dipergiatkan sehingga kegiatan menjalankan perniagaan pinjaman wang oleh sindiket ‘Ah Long’ dapat dihapuskan.

4. Selain daripada tindakan penguatkuasaan, beberapa program pencegahan dan kesedaran telah dilakukan bagi mengelakkan orang ramai dari menjadi mangsa keganasan sindiket ‘Ah Long’ iaitu seperti berikut:

- (a) Penjenamaan semula Syarikat Pemberi Pinjam Wang (PPW) yang berlesen kepada Kredit Komuniti yang bertujuan untuk memberi satu perspektif baharu terhadap industri pemberi pinjam wang berlesen. Usaha penjenamaan ini adalah perlu untuk membezakan Kredit Komuniti dengan ‘Ah Long’. Syarikat-syarikat Kredit Komuniti ini juga dibezakan dengan penggunaan papan tanda dan QR code yang seragam bagi

memudahkan orang ramai untuk mengenal pasti syarikat Kredit Komuniti yang berlesen. Selaras dengan penjenamaan semula ini, nama Bahagian Pemberi Pinjam Wang dan Pemegang Pajak Gadai yang bertanggungjawab mengawal selia industri Kredit Komuniti juga telah diubah kepada Bahagian Kawalan Kredit Komuniti;

- (b) Pelbagai program / promosi mengenai perbezaan Kredit Komuniti dan 'Ah Long' dijalankan secara berterusan seperti pameran, ceramah, mengedarkan risalah dan poster kepada orang ramai, serta kempen kesedaran menerusi media sosial seperti Facebook, Instagram dan Twitter untuk meningkatkan kesedaran kepada orang ramai agar tidak terjebak dan menjadi mangsa dengan pinjaman kredit yang tidak berlesen atau 'Ah Long'; dan
- (c) Aplikasi mobil i-KrediKom telah dilancarkan pada 5 April 2019 dan aplikasi mobil ini akan memudahkan orang awam membuat carian syarikat Kredit Komuniti yang berlesen di Semenanjung Malaysia selain memudahkan orang ramai membuat aduan. Aplikasi ini turut memberi penerangan mengenai hak sebagai peminjam dan jenis-jenis kesalahan di bawah Akta 400 dan peraturan-peraturan berkaitan.

5. Sekiranya terdapat apa-apa kemusykilan atau aduan berkaitan pemberi pinjam wang tanpa lesen ini, orang awam boleh merujuk kepada pihak KPKT melalui saluran e-aduan di laman web KPKT, aduan melalui aplikasi mobil dalam talian i-KrediKom atau aduan terus ke Bahagian Kawalan Kredit Komuniti, KPKT di talian telefon 03-88914667. Orang awam turut dinasihatkan untuk terus membuat laporan polis di balai polis berdekatan sekiranya mendapati mereka telah terjebak dengan urusan pinjaman wang haram tersebut. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 4 NOVEMBER 2020 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan apakah pendirian Kerajaan berkenaan pelan penggabungan UEM Sunrise Bhd, iaitu anak syarikat UEM Group yang dimiliki sepenuhnya oleh Khazanah Nasional, dengan Eco World Development Group Bhd.

JAWAPAN

Tuan Yang di-Pertua,

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersial yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersial dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 4 NOVEMBER 2020 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan Penerbangan Malaysia Bhd (Malaysia Airlines Bhd) yang mengendalikan penerbangan utama negara atau 'national carrier' (MAS) :-

- (a)perincian jumlah kerugian yang dialami oleh Malaysia Airlines Bhd bagi setiap tahun dari tahun 2015 hingga akhir bulan September 2020; dan
- (b)adakah Kerajaan melalui Khazanah Nasional Bhd akan menyuntik dana untuk menyelamatkan MAB daripada digulung tikar.

JAWAPAN

Tuan Yang di-Pertua,

a. Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

Prestasi kewangan MAGB antara tahun 2015 hingga 2018 adalah seperti berikut:

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

b. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.

Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.

Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Proses penstrukturan semula turut melibatkan perundingan dengan pihak pemiutang dan pajakan pesawat.

Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

Sekian, terima kasih.